

SAN PABLO KARTA NYAFXTE FXI'JNI KORINTO ÇXHABTEWE'SX JÏI

Korintotewe'sx Dxus yakh fxi'zesawe'sxtxi Pablo fxi'jni

1 ¹ Adxa' Pablo yaaseth, Dxus peeygãhçxa pa'yate Jesukristo jxkaahnisa. Txã'wë yûuwa'ja's Dxusku txhitxhçxa nvxiht. ² Korinto çxhabte yakthê'jwe'sxtxi weçxana fxi'jaçthu, txã'wëy yakthê'j Sosteneswa yuwe weçxaakaja'k. I'kwe'sxa' Kristo Jesus yakh txutemée fxi'zeyä' utxaapa'ga Dxus luuçxi'kwe. Majüwe'sxwa kwe'sxtxi jxpe'jsa Jesukristo yasena kxsussa üstxna txäawe'sx yã'lçxa ja'daçxah txajx tasxte yuuçxáa fxi'zekahnku Dxusa' pa'ya. Txäa Jesukristo' kwe'sx jxukaysatx jxpe'jsa'. ³ I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristowa. Txäa pa'ga Dxus yakhçxáa mfxi'zewe.

Jesukristo pu'çxpa'ga Dxusa' kîh yuhwa peejxmée jxukak pees

⁴ Dxusa's weçxana nesthu yu' i'kwe'sx pa'gate, txã'wë Dxusa' i'kwe'sxtxi peeygãhçxa kîh yuhwa peejxmée jxukak pees Jesukristo pu'çxpa'ga. ⁵ Txã'wë Kristo yakh fxi'zeyä' utxaapa'ga, Dxusa' txajx dxi'pte kîhtewa jxuka i'kwe'sx sxiigmée fxi'zewa'ja's jxukak üs, Dxus yuwe's pta'sxwal'j ma'k yuu, meeçxa' maa isa pta'sxsatewa jiyuwa'j ma'k yuu nawa jxuka. ⁶ Txäa pa'ga Kristo kaapiya'jni's i'kwe'sx üuste kaavxyla'ja'i'kwe. ⁷ Txã'wë Dxus pu'çxte', i'kwe'sxa' kîhte yuhwa sxiigmée i'kwe txajx dxi'pte fxi'ze' Jesukristo kîiwa'j ena's üythasna. ⁸ Dxusa' txã'wë ewçxáa jxpe'jna nes yuuna nmeh entepkaçx, kxah Jesukristo kîi ente' i'kwe'sxa' kîhte yuhwa yuuwemeesa yuune'kwe. ⁹ Dxusa' na'wë ewçxáa jxpe'jya' neeyüuk na' kxtey yuuna. Txã'wë ewçxáa jxpe'jya' íiçxáak txajx Nçxi'k Jesukristo yakh fxi'zeyä' pa'ya i'kwe'sxtxi'.

Dxus yakh fxi'zesawe'sx puutx puina txuteni

¹⁰Kwe'sxtxi jxpe'jsa Jesukristo dxi'pte yakhtē'jwe'sxtxi yu'kxpejeçthu, puutx ewteçxah puutx we'weçxa txutemée kxazí' ja'daçxah teeçxsa na'wēçxaçxáa ew yajkxna fxi'zekahn. ¹¹Kloé yattewe'sxa' adxa's pta'sxtxi txā'wē i'kwe'sxa' puina fxi'zena ūsta' jīna, txāa pa'gath adx yakhtē'jwe'sxtxi txā'wē we'we'. ¹²I'kwe'sxa' teeçxsa na'wēçxah fxiyfxyi we'wena ūsi'kwe: Maai' yu', adxa' Pablo yakh u'jsath, naapkaçxha' vxite' Apolos yakh u'jsath. Vxite' Pedro yakh u'jsath, aça' vxiteí' yu' Kristo yakh u'jsath jīna i'kwe we'we'. ¹³Nawa Kristo' ¿teeçx ahtewe'sx yakhçxáa fxi'zewa'jsaga yuúá'? ¿I'kwe'sx pa'gate Pabloa kluuste uuá'? Meeçxawa ¿i'kwe'sxa' Pablo yase's kxsusçxakwe yu'te bautisāyni yuúá'? ¹⁴Ewçxáa ne'tka i'kwe'sxtxi maa yuhtxwa yu'te bautisāymée, naasáa Krispo vxite' Gayo txāawe'sxçxáatxthu bautisāy. ¹⁵Txāa pa'ga kim yuhwa txā'wē Pablo yase's kxsusçxa bautisāynith jīya' ājameetxna. ¹⁶Vxite' Estefxanaswe'sxçxáatxthu bautisāy, meeçxa' vxitetx bautisāy wá'ntka nawa txāa yuutxi' yaaki'çmeeth. ¹⁷Kristo' adxa's bautisāyya' kaahme', naasáa kwe'sx ewte neeyūuwa'ja's pta'sxya'çxáak kaah. Nawa naa kiwetewe'sxa's jiyunisa yakhméek pta'sxkaah. Txā'wēme', Kristo kluuste uuni's pta'sxnisa' e'skhē neeyūuwe'sxte.

Nwe'weya' ājawa'ja's Dxus pheu'jçxa nvxiitnisa

¹⁸Kristo' kwe'sx pa'gate kluuste uuk jīna pta'sxni' kīhwa seelpimeesa na'wē ne' pthūuse' vxituçxa nxus kiwete u'jwa'jsatxi'. Nawa Dxus yakh ūsya' u'jwa'jsa kwe'sx yuutxi' txā'wē pta'sxni' seena' wala seelpisa', kwe'sxtxi ewte nvxiitwa'jsa' naa pa'ga. ¹⁹Dxus librute we'weçxa':

Ivxiitu'nja naa kiwetewe'sxçxá's jiyuni's,

Sa' naa kiwetewe'sxçxá's jiyuni's kīhte yuhwa selpiiwa'jmée nvxiitu'nja jī'k.

²⁰Txā'wē' aça' naa kiwetewe'sxçxá's jiyuni' ¿kīhte selpiikx? Kīhtewa jxuka jiisa kaapiya'jsatha'w sūhsa' ¿mtee yuutxki? Naa kiwete kīh ūsna txā'sna jxuka jiisathē'j ¿kīh yuukx? Açxha' txā' ¿kīhteçxá' selpiima'k? Naa kiwetewe'sxçxá's jiyunisa's kīhtewa seelpimeek vxit Dxusa'.

²¹Dxusa' jiyuk naa kiwetewe'sxçxá's jxuka jiyusa' Dxusa's jiyuya' ājawa'jmeesatawa. Txāasak kīhtewa jiimeeçxawa txā'sna ūsuh jxuka yajkxçxa txajx pta'sxni's wa'lmée jxpa'gateçxáa nwe'wewa'ja's vxit, makwe txajx pta'sxni' vxite yakh yu' seelpimée na'wētewa.

²²Judiuwe'sxa' cielujū seena'sa kaavxya'jal'jni'stxi uy wēje', naapkaçxha' griegowe'sxa' naa kiwete jiyunisa'stxi pakwé'. ²³Nawa kwe'sxa' Kristo's kluuskhē ki'pçxa ikhniçxá'stha'w pta'sxi'. Judiuwe'sxa' txā'wē pta'sxni'stxi jxpuba', naapkaçxha' griegowe'sx yuutxi'sa' kīhtewa seelpimée luuku we'weni na'wē ne' pthūuse'. ²⁴Nawa Dxus txhitxhnisa

judiu vxite' griego txāawe'sx yakh yu', Kristo yuuçxáa nwe'wewa'jsa', nwe'wewa'ja's Dxus pheu'ljçxa nvxiitnisa. ²⁵Naa kiwete nasa jiisa ūstxna txāawe'sx yakh yu', Dxus jiimeesa na'wēsaçxawa, txāawe'sxte jxthaakwe jiisa' Dxusa'. Aça' Dxus çxhãçxhameeçxa ājasamée na'wēsaçxawa, nasa naa kiwetewe'sxte jxthaakwe çxhãçxhasa'. ²⁶Yakhthē'jwe'sx, i'kwe'sxtxi Dxus txhitxhni's mjiyuwe. I'kwe'sxa' naa kiwetewe'sxa's yu' walamée jii i'kwe sa' çxhãçxhasawa kuhmée i'kwe, sa' jxtuhtesawa kuhmée i'kwe. ²⁷Txā'wēçxawa i'kwe'sxa' Dxus txhitxhnisa i'kwe, i'kwe'sxtxi jiimeesata' jina naa kiwetewe'sx nasa we'we'tx txāawe'sxtxi kaythame'jwa'jsa. Sa' txā'wēy naa kiwete nasa we'weçxa': Çxhãçxhamée āhmesata' j'i'tx txāawe'sxtxiwa kaythame'jwa'jsa. ²⁸Naa kiwete nasa we'weçxa': Kīhtewa seelpimeesata' jīnatx açewe'we' txāa açewe'wesatx seelpimeekhē nvxiitwa'jsa i'kwe. ²⁹Txā'wē i'kwe'sxa' āhmeekwesatx txhitxhnisa i'kwe na' kim yuhwa Dxus dxi'pte iwejçx yajkxna fxi'zeya' ājameene'kwe. ³⁰Kristo Jesus yakh fxi'zewa'ja's Dxusku vxit. Aça' Kristo's jiyuwa'ja'swa Dxus fiçxáak vxit. Sa' txāa Kristopa'ga yuuçxáa kwe'sxa' Dxus dxi'pte ewtetha'w neeyūu, txajx tasxu txutemée fxi'zeya'. ³¹Txāa pa'ga Dxus yuuçxá's weçxana tuuthe'jwa'ja's Dxus libruete na'wē fxi'jni ūsa': Maawa jiith sūhna jxtuhthe yaakwēje'ççxa', Dxus yuuçxá's weçxana tuuthe'jwa'ja' jī'k.

Kristo kluuskhē uuk txajx kaapiya'jni's pta'sxni

2 ¹Yakhthē'jwe'sx, adxa' Dxus yuwe's kaajiyu'jya' kxtee pa'ljçxa', jiisa we'weni seena' zhiçxkwesa yakh pta'sxna pa'ljmeeth. ²Kxtee i'kwe'sx yakh ūsçxa', naa kiwetewe'sxa's jiyunisa yakh pta'sxna ūsu'çmeeth, naasáa Jesukristo's kluuskhē ki'pçxa ikhniçxá'sthu pta'sxna ūsu'. ³I'kwe'sx tasxte pa'ljçxa', wala jiisa na'wē pa'ljmée, wejxwa jiimeesa na'wē ūukhna pa'ljçxath Dxus yuwe's i'kwe'sxtxi pta'sx. ⁴Nawa naa kiwetewe'sxa's jiyunisa yakh we'weçxa i'kwe'sxtxi' knaymeeth. Txā'wē yūumée, wejxwa Dxus pu'çxte txajx Espiritu yakhçxáath kaajiyu'ljçxa i'kwe'sxtxi' knay. ⁵I'kwe'sxa' naa kiwetewe'sxa'sçxáa piyaçxa Dxusa's jiyumée, wejxwa Dxus fiçxáa pu'çxte Dxusa's jiyusa yuukahnthu naa kiwete jiyunisa yu'sa' we'wemée.

Dxus pheu'jniti' txajx Espiritu yakh fiçxáak ya'jiyu'

⁶Txā'wēçxawa, Dxusna ew yā'lj jiisa yakh yu' txā'wē we'weni' seena' yuh jiisa we'wenisata'. Nawa txā'wē we'weni' naa kiwetewe'sxmeeta', sa' naa kiwete ne'ljwe'sx skhēwwa'jsa ūsta' wala jiisa txāawe'sx we'weniwa meeta', ⁷wejxwa naa kiwe meetey bagaçxte yuhwa pçumée kwe'sx ewte neeyūuwa'ja's Dxusa' pheu'ljçxa ji'phyā'kh yu' kim yuhwa jiyunimeesa txā'snatha'w pta'sxi'. ⁸Txā'sa' naa kiwete ne'ljwe'sx kim yuhwa jiyumeeta'. Jiyuwaça', kluuskhē ki'pçxa ikhwa'jmée ne'ta yu' kwe'sxtxi

jxpe'jsa cielujũwe'sxa's. ⁹Nawa Dxus librute fxi'ljni ũsyã'kh yu' txã'wẽ jiyuwa'ja'smée, txãa pa'ga ne'ta jiyumée. Txajjik na'jĩ:

Dxusna yaakxsawe'sx jii Dxusa' pheu'kh txãa pheu'jni's

Kim yuhwa iuymeeta', sa' iiwẽse'jwa meeta',

Sa' ũusteçxáa yuhwa yaakxni ji'phu'çmeeta' jina fxi'ljni'.

¹⁰Dxusa' txajx Espiritu yakhku txã'wẽsatx kwe'sxtxi kaajiyu'j, txãa pa'gately txajx Espiritu' Dxus pheu'jni kim yuhwa jiyuwa'jmeesa ũstxna txãatx jxuka jiisa'. ¹¹Ayga nasaa pwe'sxçxáa yuhwa çkim jiyuya' ajakx vxitee ũus yaakxni's? Naasáa txã'wẽ yaakxsayçxáa çjiyumeema'k? Txã'wẽy Dxus Espiritu yuuçxáa jiia' Dxus yajkçxça pheu'jnizatxi'.

¹²Kwe'sxa' naa kiwetewe'sxa's jiyunisa's jxpa'gaçxa ũsmetha'w. Dxus Espiritu txajx tasxu yuusa'stha'w jxpa'ga, Dxus peeygãhçxa kwe'sxtxi ew yũuk txãatx jxuka jiyuya'. ¹³Txãasatha'w kwe'sxtxi Dxus ew yũuni's txajx Espiritu kaajiyu'the pta'sxya' aja', sa' naa kiwetewe'sxa's piyani's pta'sxi'çmeetha'w. Dxus jii'txi' Dxus Espiritu yakhfiçxáatha'w pta'sxi'.

¹⁴Nawa Dxus Espiritu's ũuste ji'phmeesa' Dxus Espiritu we'weni's jiyuya' ajameetxna. Txã'wẽsa yakha' jiimeekwesa we'weni na'wẽçxáa pthũusena. Dxus we'wenitxi' Dxus Espiritu yakhçxáa ya'jiyuna, txãa pa'ga Dxus Espiritu yakhmée yu' jiyuya' ajameetxna. Dxus yaakxnitxi' Dxus Espiritu yakhçxáa jiyuya' ajatxna. ¹⁵Nawa maawa Dxus Espiritu's ũuste ji'phsa' jxpubamée ew jiyuya' ajatxna, aç'a' txã'wẽ yũusa's jxpubana ũsa' jiya' ajameetxna maa yuhwa. ¹⁶Txã'wẽ jiyuya' ajawa'jmeete fiçxáak Dxus librute na'wẽ we'we': çKim jiyuya' ajakx Dxus yaakxni's? Dxusa's çkim kaapiya'jya' ajakx? jĩ'k. Txã'wẽtewa, kwe'sxa' jiitha'w Kristo yaakxni's, Dxus Espiritu kaajiyu'pha'ga.

E'zsa Dxus tasxte mjiisaçxáatha'w

3 ¹Yakhthẽ'jwe'sx, makwe wala jiisa ne'kwe nawa Dxusa's ew jiisa yakh na'wẽ yu' we'weya' ajameeth, Dxusa's kĩh yuhwa jiimeesa yakh na'wẽçxáath we'weya' aja. Kristo kaapiya'ljni yu's kĩh yuhwa jiiimée luuçx le'çxkwe na'wẽçxáa i'kwe. ²Luuçx le'çxkwesa's ma'wẽta leçxiçxáana puuçu' vxite ũ' yu's puuçmée txã'wẽy i'kwe'sxtxi' kaapiya'lçxawa thẽymeekuẽsaçxáanath kaapiya'lçxça nvxiht, txã'wẽ thẽysa yu'sa' ajameei'kwe naa pa'ga sa' açxpkaçx jiyuya' aja'çmeei'kwe. ³Txãasa açxpkaçx i'kwe'sx ũuste Dxusa's yu' kĩh yuhwa ji'phmeei'kwe, txãasa i'kwe puutx yahçena puiina txuteeçxa fxi'ze'. Txã'wẽ yũunisa', Dxusa's ũuste ji'phmeesa fxi'zenisa'. ⁴Txã'wẽ Adxa' Pablo yakh u'jsath jĩçpkaçxha' vxite' Apolos yakh u'jsath jina txã'wẽ yũuçxa', Dxusa's çma'wẽçxáa yuhwa ũuste ji'phmeesa na'wẽ yuh meekwe wakx? ⁵Ūus miijakxwe: Pablo' çkĩh yũusaana? Aç'a' Apoloswa çkĩh yũusaana? Kwe'sxa' naasáa Dxusna selpisaçxáatha'w, Dxus ma'wẽ jxkaathe' txã'wẽy mjiitha'w teeçxsa na'wẽçxah, txãa pa'ga i'kwe Kristo's jiyuwa'ja's ji'phu. ⁶Adxa' nyafxte uuhsaçxáath yu', naapkaçxha'

Apolosa! yu'awsak yu'. Nawa Dxusku kbuuçxa'ljçxa nuywala. 7Txã'wẽ uuhsa vxite! yu'awsa txã'wẽ yũusa! kĩhwa jxtuhthesameeta!, naasáa Dxus yuuçxáa jxtuhtesa!, txã'wẽ kbuuçxa'ljçxa nuywalapa'ga. 8Uuhsa vxite! yu'awsa txãawe'sxa! maa yuhwa jxthaakwesamée, txãa na'wẽçxaçxáata!. Nawa dewewa'lj yu'sa! txakweçxaçxáa yu'mée Dxusa! deweena, makwe mjĩite!, txã'sçxáan deweena. 9Dxus mjĩinite kwe'sxa! kxtee mjĩisaçxáatha'w, açá! i'kwe'sxa! Dxus mjĩini kiwe na'wẽsa i'kwe.

Txã'wẽy i'kwe'sxa! yat na'wẽsa i'kwe, açá! txãa yata's txahna pheu'jsa! Dxusa!. 10Dxus jxkaathe adxa! yat txajxa! jiisa na'wẽ yat txaahwa'ja's kaaçxida'jsaçxáath. Açá! adx takhni kajkwete! vxite mjĩina ũsa! yata's. Nawa ma'wẽ mjĩiwa'ja'swa jxpa'yakx mjĩiwa'lj ji'pha! teeçxsa na'wẽçxah. 11Yat txaahwa'ja's takhna kaaçxida'jni ũsyã'ja! txã! Jesukristo!, açá! kim yuhwa vxite fxiy kaaçxida'jwa'lj ji'phmeeta!. 12Na'wẽ kaaçxida'jni kajkwete kĩh yakhwa mjĩitxna: vxyuu beh, vxyuu çxihme, kwet zhiçxkwesa yakh meeçxawa fxtũu, çhĩçh, khĩh txã'wẽsa yakh. 13Nawa Dxus kastigãywa'lj ente ya'pdx'i'puçxa ya'ljiyuna ma'wẽ mjĩini'swa. Txãa ente! ipx yakh kĩjana, açá! txãa ipxa! kaajiyu'juna mjĩisa ma'wẽ mjĩini'swa. 14Txãa kaaçxida'jni kajkwete mjĩisa! ew wãa mjĩina ipxte çxhavxywa'ljmeesa yakh açá! txã'wẽ ew mjĩipa'ga dewaní yuuna. 15Nawa txãa yatte mjĩisa! ipxte çxhavxywa'ljsa yakh wãa mjĩina açá! jxuka çxhavxyte!, mjĩipa'ga dewanimée yuuna. Naasáa kxtee mjĩisa yuuçxáa ewte neeyũuna, txãa ipx walajũ ũphna kasehsa na'wẽ.

16I'kwe'sxí Dxus ũswa'lj yati'kwe, naa pa'ga Dxus Espiritu i'kwe'sx ũuste u'pwa'jsate jiimeewá'kwe. 17Dxus ũswa'lj yata! kĩh pkal yuhwa ji'phmeesa na's maawa Dxus ũswa'lj yata's ivxiitute!, Dxusa! ivxiituna txã'wẽ yũusa's. Txãa Dxus ũswa'lj yata! i'kwe'sxi'kwe.

18I'kwe'sxa! maa yuhwa jxpubanuwe, wala jiisatha'w sũhna. Maawa naa kiwetewe'sxa's wala jiisa ũsçxa!, jiimeekwesa na'wẽçxáa miyajkxwe. Txã'wẽ yuuçxáa, wala jiisa yuuna pa'jane'kwe. 19Naa kiwetewe'sxçxáana wala jiyuni!, Dxus dxi'pte! kĩh yuhwa seelpimeesa!. Txajík Dxus libroute na'wẽ we'we!: Wala yã'lj jiitha'w sũhna fxi'zesatxi! ewmeete khẽewa'ja'sku vxitu! Dxusa!, txã'wẽ yaakxpa'ga. 20Txã'wẽy vxite ajkhẽwa na'wẽ fxi'jni ũsa!: Wala jiitha'w sũhna fxi'zeni!, kĩhte yuhwa seelpimeetewa jia! Dxusa! jĩ'k. 21Txãa pa'ga nasaçxáatx jxthaakwe iwejçx iwejçx yajkxna fxi'zewa'ljme!. Txã'wẽ yaakxkahmení kĩhwa jxuka i'kwe'sx jĩiçxaçxáata!. 22Pablo ma'k yuu, Apolos ma'k yuu, Pedro ma'k yuu, naa kiwe ma'k yuu, itxi fxi'zenisa ma'k yuu, uuwa'lj ma'k yuu, naa ensu fxi'zeni ma'k yuu, vxite ensu fxi'zewa'lj ma'k yuu, nawa txã! jxuka i'kwe'sx jĩiçxaçxáata!. 23Naapkaçxha! i'kwe'sx yu! Kristo jĩi i'kwe, açá! Kristo yu! Dxus jĩ!.

Jesukristo jxkaahnisawe'sx mjĩini

4 1Txã'wẽyã'the!, kwe'sxtxi! naa sũhnaçxáa mfxi'zewe: Kwe'sx ewte neeyũuwa'ja's Dxusa! txãniitey pheu'ljçxa ji'phu'k kim yuhwa

jiyunimeesa txã'sna pta'sxkahn neewe'weçxa nvxihtte Kristo tasxte selpisaatxna sũhnaçxáa mfxi'zewe. ²Txã'wẽ mjiiwa'ja's jxpa'gasa' ma'wẽ mjiiwa'ja'swa jxuka kxtey yuuwa'j ji'pha'. ³Adx mjii'ni's i'kwe'sxa' ma'wẽwa nuywe'wene'kwe. Nawa i'kwe'sx we'wenitxi' adxa' le'çxkweçxáa yuhwa yaakxwa'j ji'phmeeth. Adxiçxáa yuhwa adx mjii'ni' ewa' sũju'çmeeth. ⁴Nawa adx ùste yu' ewme' sũhna yu'çme'. Aça' adxa' ew mjii'sath jičxa txã'wẽ we'weçmeeth. Jesukristo yuuçxáa adx ma'wẽ mjii'satewa we'wewa'j ji'pha'. ⁵Txãa pa'ga mjii'ni's we'wewa'j en ähmeyna yu', i'kwe'sxa' nuywe'wenuwe. Müythaswe Jesukristo kũhpkaxç. Txãa yuuçxáa ew ma'k yuu ewmée ma'k yuu nawa kaajiyu'juna makwe jiyunimeesa ùsteçxáa yaakxnisa sũthni yuu ma'k nawa jxuka. Txã'wẽ yũunijũ ya'jiyuna nasaa iisa ma'wẽ yũusaaxawa.

⁶Yakhthẽ'jwe'sx, txã'wẽ nuywe'wena fxi'zeni'sth u'kxpeje', Apolos fxi'zeni vxite' adx fxi'zeni txáatx thegçxa txã'wẽy fxi'zekahn. Txã'wẽ yuuçxáa, i'kwe'sxa' jxpubamée fxi'zene'kwe Dxus yuwe ma'wẽ jxkaathe' txã'sçxáa kxtey yuuna. Sa' kim yuhwa txã'wẽ teeçxsaçxá's weeçx yajkxna wedxçxa', vxite yu's ahçena fxi'zemeene'kwe. ⁷Idxa's çkimga jxthaakwe walasa vxite? Txã'wẽ Dxus peesnimeesa çkĩhçxá' ji'phga'? Txã'wẽ kĩhwa jxuka Dxus peesniçxá's ji'phçxa', çma'wẽçxaga iwejçx yaaki', idxçxáa pakweçxa uysáa na'wẽ?

⁸I'kwe'sxa' kĩhwa peejxmée ji'phsa na'wẽ yã'ji'kwe yaaki'. Kwe'sx yuutxi' e'skhẽ nvxihtçxa, jxkaahsa na'wẽ i'kwe yaaki'. Wejxwa jxkaahsaíi yuuwaça' ewna, kxah i'kwe'sx jxkaahnite kwe'sxwa ih üsya' äja'nja'w sũju'th. ⁹Kwe'sxa' Jesus jxkaahnisatha'w nawa Dxusa' nmejkhẽ ne' nvxiht sũju'th, naasáa ikhwa'j nvxiitnisa na'wẽçxáatha'w. Kwe'sx pxthaa yuuçxa uuçte', angeleswe'sx vxite' nasawa thegkahn nasa walaa ksxavxyte nvxiitni na'wẽ üstha'w. ¹⁰Kristo kaapiya'jni's pta'sxpa'gaçxáa kwe'sxtxi' kĩhtewa jiimeesa luuku we'wesata' jĩ'tx, naapkaçxha' i'kwe'sx yu' Kristo kaapiya'jni's sxiigmée jxuka jiisa na'wẽ i'kwe yaaki'. Kwe'sxa' ähmeekwesatha'w, naapkaçxha' i'kwe'sx yu' jxtuhtesa i'kwe. Kwe'sxtxi' açe'tx nasa', nawa i'kwe'sx yuutxi' peeygãja'tx. ¹¹Äçxpkaçx pxthaa yuunatha'w fxi'ze', nasa ewmée nuywe'weni, wëena, yũ'wëena, athwa'j ropa ji'phmée, yatwa ji'phmeetha'w, ¹²sa' kuseju mjii'na wahtxnatha'w fxi'ze'. Nasa' kwe'sxtxi wëesxutewa, ewçxáatha'w pasu'. Kwe'sxtxi pkxuuna pãpaçtewa, wantäyçxa iideewe'çmeetha'w. ¹³Kwe'sxtxi açewe'weçtewa, ka'tu' peeygãhnatha'w yu'kxpeje'. Naa kiwete kxtã' seelpimeesa na'wëtha'w fxi'ze', kazxsa's wãataani na'wëtha'w yahçena fxi'ze' äçxpkaçx.

¹⁴I'kwe'sx thaamekahn txã'wẽ fxi'jaçmeeth, wejxwa adx luuçx wedxnisa na'wẽ yu'kxpehnaçxáath fxi'ja'. ¹⁵Kristo jxkaahni's kaapiya'jasa diez mil ma'kwe ji'ph yuu, nawa ney na'wësa yu' kuhmée ji'phi'kwe. Txã'wẽ Kristo Jesus yakh fxi'zewa'ja's kaapiya'pha'ga i'kwe'sx ney

na'wësa' adxthu. ¹⁶Txã'wëth i'kwe'sxtxi neewe'we', adx na'wëy fxi'zekahn.

¹⁷Txãasa kajaçthu Timoteo adx nçxi'k wedxni na'wësa Kristo yakh txutemée fxi'zesa's. Txã' i'kwe'sxtxi kaayaki'jina adx ma'wë ne'tka Kristo yakh fxi'ze txã'sna. Sa' txã'wëy mteeçxah Dxusa's jiisa pkhaakhena üstxna kxsü pekühçxa', ma'wë ne'tka kaapiya'ja' txã'snafiçxáa kaayaki'jina. ¹⁸I'kwe'sx maai' yu' wala çxhãçxha iivejçx yajkxna üsi'kwe, Pablo' bagaçx yuhwa pa'lmeena jina. ¹⁹Nawa Dxus ma'wë jxthãaste', dud yuwe'nja puutx uyya', txã'wë iivejçx we'wena üssa kih ma'tx yuu aan çxhãçxha we'wena üsçxa', txã'wëy Dxus yakhwa çxhãçxha fxi'zena üstxna. ²⁰Dxus yakh fxi'zenisa' yuwejuçxáa iivejçx we'wena fxi'zenimeesa', wejxwa Dxus ma'wë jxkaathe', kxtey yuuna fxi'zewa'ja'. ²¹I'kwe'sxtxi adx thegya' pa'lçxa' çma'wëkwe yuu jxthãasu'? çPeçxuukwe jxthãasukwe', meeçxa' peeygãhnakwe pa'l jxthãasu'á'?

Peekx nji'j npaasa yakh i'çxáa nyu na'wë fxi'zesa

5 ¹Teeçx i'kwe'sx yakh pkhaakhesa' peekx nji'j npaasa yakh i'çxáa nyu na'wë fxi'zena üsa' jnik ya'jiyu'. Txã'wë fxi'zeni' pkal iiméh wala kazxa'. Dxusa's jiimeesa yuhwa txã'wë yu' fxi'ze'çmeeta'. ²Txã'wë kazx pkal yuusa's i'kwe'sx kxavxyu kutxi'jipkaçxte, ewsatha'w sühna iiveeçxwa'lçxá's i'kwe yaaki'. ³Adxa' i'kwe'sx yakh ih yu' üsmeeth, nawa adx üus yaakxni yakh yu' i'kwe'sx yakh ih üsthu. Txãasath txãa piçthë'j ma'wësatewa jiyuçxa', kastigäywa'theyä'j nvxiht, adx üus yaakxni yakhçxáawa. ⁴I'kwe'sxa' Jesukristo's neewe'weçxa txajx dxi'pte mpuutxwe'wewe pkhaakheçxa. Aça' adxwa i'kwe'sx yakh ih üs na'wëyçxáa pu'çxhi'nja, aça' Jesukristowa i'kwe'sx yakh ih üsuna. ⁵Txã'wë yüuçxa txãa piçthë'ja's eçxthë'j kusete manvxihtwe, txajx kakwe' vxitukahn. Nawa txajx üus yu' vxitumeena Jesukristo kii ente'.

⁶I'kwe'sxa' txã'wë kazx pkal yuusa's kutxi'jmée üsçxa', iivejçx yajkxna üswal'j ji'phmeei'kwe. Jiimeewá'kwe na'wë we'weni's: Lewadura' le'çxkuëeçxawa skuutxh ü'wete jxuka pëetheje'k jini's. ⁷Lewadura ewmeesa's mkuutxi'jwe pëethekahmen, kxah i'kwe'sxa' Paskua fxiestate ü'nisa pan lewadura ji'phmée na'wë yuune'kwe. Txã'wë pkal ji'phmée fxi'zekahnku Kristo' kwe'sx pa'gate uu, txã' kwe'sx Paskuatawe'sx piisakuëk yu'. ⁸Txã'wëyá'the', kwe'sx üuste kih yuhwa ewmeesa ji'phmée Dxusa'sçxáa üusuh jxuka yajkxna kwe'sx Paskua fxiesta's vxitwal'j ji'ptha'w. Txã'wë ew yajkxna vxitni', pan lewadura ji'phmeesa yakh fxiesta's vxitni na'wësa'. Nawa ewmée yajkxna Paskua fxiesta's vxitwal'j ji'phmeetha'w. Txã'wë ewmée yajkxna vxitni', lewadura ewmeesa yakh fxiesta's vxitni na'wë'.

⁹Nyafxii vxite karta fxi'th txãate' na'wëth yüukaah: Kazx pkal yuuna fxi'zesa yakh pkhaakhenuwe jnath fxi'lj. ¹⁰Txã'wë kazx pkal yuuna

fxi'zesa yakh, vxitee jïitx kusa'j wēesa, pesweesa, dxus ïtximeesatx neewe'wesa txāawe'sx yakha' jxukate mtxuteewe peena yu' puutx uymée fxi'zeya' jïçxa txā'wē we'wemeeth. Txāawe'sx yakh puutx uyya'mée txutee wēeçxa', naa kiwejū kasehçxa yuuçxáa txā'wē peena yu' puutx uymeene'kwe. ¹¹Na'wēth yūukaah txā'sna ne'kwe jiyumée: Maawa yakhtē'tha'w jïççxawa, kazx pkal yūuna, vxitee jïitx kusa'j wēesa ma'k yuu, dxus ïtximeesatx neewe'wesa ma'k yuu, açewe'wena wēesxuusáa ma'k yuu, tūsáa ma'k yuu, meeçxa' pesweesa ma'k yuu, txā'wē yūuna fxi'zesa's i'kwe'sx ksxavxyte jxpe'jnuwe jīnaçxáath we'wena fxi'j. Nasa txā'wēsa's i'kwe'sx yat-su pi'kxwa'jme', aça' ka'tuwa pi'kxmeena. ¹²⁻¹³Dxusna jiimeesatxi' txāawe'sx ma'wē yūusaatewa adxa' txāatxi' paapējxna kastigāywa'j jī'phmeeth. Dxusçxáa kastigāywa'jsa' txāawe'sx ähmée yūusaatxi'. Nawa i'kwe'sx ksxavxyte ūssa yakhtē'jwe'sx ähmée yūuni yu's i'kwe'sx paapēywa'jsai'kwe. Txāasa txāa kazx pkal yūusa's i'kwe'sx ksxavxyu mkuutxi'jwe.

I'kwe'sx yuuwe yuuni's Dxusa's jiimeesa khuēs tasxsu paatxhī'khni

6 ¹I'kwe'sx pwe'sx yuwe susni's çkīh yūuçxakwe Dxusna jiimeesa khuēs tasxsu paatxhī'khya' u'jwe', wejxwa yuwe susni's Dxusa's jiisa pwe'sx i'kwe'sxçxáa pheu'jupkaçxte. ²I'kwe'sxa' jiimeewá'kwe Dxus luuçxyā'ja' naa kiwe yuhnawa kwe'sx jxkaahwa'jsameewá'ntka'w. Txā'wē naa kiwe yuhnawa i'kwe'sx jxkaahwa'jsaçxa' çkīh yūuçxakwe yuwe thēyimeesa yu's pheu'jya' āja'çmée? ³I'kwe'sxa' jiimeewá'kwe kwe'sxa' angeleswe'sx yuhtxwa yu'kxpehwa'jsameewá'ntka'w. Txā'wēçxa', kwe'sx pwe'sx yuwe susni's wejx ūukhmée pheu'jwa'j jī'ptha'w. ⁴I'kwe'sx pwe'sx kazxthē'j susna puini's çkījxa'kwe paatxhī'khya' u'jwe' Dxusa's jiimeesa tasxsu? ⁵Na'wēth we'we' i'kwe'sx thaamekahn: çYakhtē'jwe'sx pwe'sx yuwe susni's pheu'jwa'jsa teeççxáawa jiisameewáana açne'kwe txā'wē vxitetx pi'kxya' u'jwe'? ⁶Yakhtē'j pwe'sx yuwe susni's Dxusna jiimeesa khuēs tasxsu paatxhī'khte' çewmanx?

⁷Txā'wē i'kwe'sx pwe'sxíçxáa puutx puina fxi'zeni' kazx thaampa'sa', aça' çmjïitekwe i'kwe'sxtxi pesweena ma'wēwa pthāaweçtewa Dxusa's jiimeesa tasxsu yu' paatxhī'khya' u'jmée sxuuna' neeyū'çmée? ⁸Txā'wē yūumée i'kwe'sxtxi pesweete', i'kwe'sxwa yakhtē'j jïitxíçxáa pesweena kīhwa ewmée i'kwe yū'.

⁹⁻¹⁰Jiimeewá'kwe Dxus jxkaahna ūsnite u'kaya' ājawa'jsameeta' txā'wē ewmée yūusa' jīni's. Jxpubanuwe, txā'wē yūusa' Dxus jxkaahna ūsnite u'kaya' ājawa'jsameeta': Pkal kazxsate fxi'zesa, dxus ïtximeesa's neewe'wesa, ptamçxawa vxitee yakh fxi'zesa, piçthē'j pwe'sxíçxáa pkal yuuna fxi'zesa, pesweesa, vxitee jïitx kusa'j wēesa, tūsáa, wēesxuusáa, ïsxiiçxa vxitee jī's iiyamusa txāawe'sxa' Dxus jxkaahnite u'kaya' ājameetxna. ¹¹I'kwe'sxa' nyafxí yu' txā'wēsa i'kwe yu'. Nawa açxha'

Dxus peltunãyte!, jxuka yaateni i'kwe, sa' Jesukristo vxite' kwe'sx Dxus Espiritu pu'çxte!, Dxus yakh yuuçxáa fxi'zesai'kwe.

Peekx kakwe's pkalte kaafxi'ze'jwa'jme'

¹² Kwe'sxtxi ma'wë yüuweçxtewa ma'wëwa fxi'ze'nja'w nawa kwe'sx fxi'zeni's kim yuhwa yupmeena jì'tx txâ' isa yuja'. Nawa jxuka yuutxi's nwëese'jwa'j jì'phmeetha'w, maaí yu' seelpimeesata' txâa pa'ga. ¹³ Isatx we'we!: Û'a' tutxhtewe'sxa', naapkaçxha' tutxha' ù' jxpa'gawa'jsa', açà' txâatxi' çkim yupuukx? jì'tx. Isa txâa e'zsa' txâ'wëte'we'sx yuhta', açà' txâatxi' we'wewa'j jì'phmeetha'w, pçuwa'jsaçxáata' naa pa'ga. Nawa kakwe's ptammeesa yakh pkalte kaafxi'ze'jwa'jme', txâa pa'gatey kwe'sx kakwe' Kristo jì', naapkaçxha' Kristo' kwe'sx kakwe's jxpe'jsa' naa pa'ga. ¹⁴ Dxusa' ma'wëga Kristo's itxi vxit, txâ'wëy kwe'sx kakwe'swa thëymée itxi vxit ya'wa', naa pa'ga pkalte fxi'zewa'jsame'.

¹⁵ I'kwe'sx kakwe' teeçxsa na'wëçxah Kristo kakwe'fiçxá', açà' txâ'sa' jiimeewá'kwe. Txâ'wëte!, Kristo kakwe's uweçxa u'y ewmeesa yakh utxaate çewmanx? Weh yuhwa txâ'wë yüuwa'jme!. ¹⁶ Meeçxa' i'kwe'sxa' jiimeewá'kwe, u'y ewmeesa yakh pkal yünunijü' teeçx kakweçxáak yuuna pa'ja' jini's. Txâ'sna we'weçxak Dxus librute na'jì!: E'zsa teeçx kakweçxáak yuuna pa'jana jì'k. ¹⁷ Txâa pa'gak maawa Kristo yakh utxaate!, Kristo yakh teeçx kakweçxáa yuuna pa'ja' Dxus dxi'pte.

¹⁸ Ma'wë yuhwa nyumeesa yakh kazx pkal yuuwa'jme!. Pkal ma'wësawa üsta', nawa peekx kakwe yakh yu' meek pkal yu'. Nawa ptammeeçxa kazx pkal yuuna fxi'zesa' txajx kakwe's fiçxáak suwu', pkalte jxüna u'lçxa. ¹⁹ Jiimeewá'kwe i'kwe'sx kakwe' Dxus Espiritu u'pwa'ja', txâa pa'ga i'kwe'sx üuste! Dxus Espiritu u'pa', açà' kakwe' i'kwe'sx jii me!. ²⁰ I'kwe'sxa' Dxus weynisai'kwe wala pa'gate. Txâ'wëyã'the!, kazx yüumée Dxus dxi'pte ewçxáa yüuna mfxi'zewe i'kwe'sx kakwe yakh vxite' i'kwe'sx üus yaakxni yakhwa txâ'wëy. Txâ'wëme!, e'zì Dxus jiiçxaçxáata'.

Ptamunisu yu'kxpehni

7 ¹ I'kwe'sx pëjxna fxi'jni's açxh pasya'wath. Piçthë'ja' nyu jì'phmée fxi'zetewa ew yuhna. ² Nawa txâ'wë pkal kazx yuuwa'lçxáak wala kaseje! naa pa'ga piçthë'ja' nyu jì'phuwa'ja', açà' txâ'wëy u'ywa peekx nmi' jì'phuwa'ja'. ³ Nmi'a' zhiçxkwe fxi'zewa'ja' txâawe'sx nyu yakh, açà' nyua' txâ'wëy ew zhiçxkwe fxi'zewa'ja' txâawe'sx nmi' yakh. ⁴ Nyua' peekx kakwe' sühna yaakxwa'j jì'phme!, txajx kakwe' nmi' jì' naa pa'ga, naapkaçxha' nmi'wa peekx kakwe' sühna yaakxwa'j jì'phme!, txajx kakwe' nyu jì' naa pa'ga. ⁵ Ptamsa yã'ja', ih fxi'zeni's puutx wa'lwa'jme!, naasáa Dxusna orãyya'waçxa yuuçxáa, maz ençxáawa txutewa'ja'. Nawa e'su yã'ja' ki' ih fxi'zewa'ja', txâ'wëme' eçxthë'j kaypuba'jwe'sxte.

⁶Maawa jxukaysa ptamuwa'ja's jxkaja'çmeeth, nawa ptamuçxa fxi'zenik adx yakha' ew thegu' naa pa'gaçxáath txā'jī'. ⁷Jxukay adx na'wēçxaçxáa fxi'zewaç, wejx ewna sūju'th. Nawa Dxusa' nasaa iisa fxiyfyiy fxi'zewa'ja's ne' pees, vxitetxi' ptamuçxa fxi'zewa'j, vxitetxi' ptamumée fxi'zewa'j.

⁸Vxiudawe'sx vxite' ptammeesatxthu yu'kxpeje' txāawe'sxa' ptamumée adx na'wēçxáa fxi'zewaç wejx ewna. ⁹Nawa peekx kakwe jxthāasni's neeweya' ājasame' ptamuçxa fxi'zeni wejx ewna, txāasuçxáa yajkxna fxi'zeya'mée.

¹⁰Nawa āçxha' ptamsatxthu jxkaaja': nyua' nmi' yakh txutewa'j ji'phme'. Na'wē jxkaahni' adx yajkçxa we'wenime', Dxusku txā'wē jxkaaja'. ¹¹Nawa maa enteya' maaíi yu' txā'wē nmi' yakh txutewána nawa txāa u'ya' peena yu' vxite yakh iimi'ya' ājameena. Meeçxa' nmi' yakh ki' yuwee ewuuçxa yu' nmi' tasxtey ki' sxawedxa' ājana. Txā'wēy nmi'wa txajx nyu yakh txuteeya' ājameena.

¹²Āçxha' vxitetxi' adx úus yaakxni yakhthu yu'kxpeje': Maa yakhthē'j nyuuwa Kristo's ūuste jxpa'gasameeçxawa, nmi' yakh wa'lmée fxi'ze wēeyā'the', nmi'a' txutemeete ewna. ¹³Txā'wēy nyua' Kristo's jxpa'gasatewa nmi'a' Kristo's jxpa'gasameeçxawa, nyu yakh wa'lmée fxi'ze wēeyā'the', txāa nyua' txutemeete ewna. ¹⁴Nmi' Kristo's jxpa'gasameeçxawa, txajx nyua' Kristo's jxpa'gasa yakh wa'lmée fxi'zepa'ga, txāawe'sx ptam fxi'zeni' Dxus dxi'pte ewsa'. Aça' txā'wēy nyu ma'k Kristo's jxpa'gasamée yuu nawa txajx nmi' Kristo's jxpa'gasa yakh wa'lmée fxi'zepa'ga txāawe'sx ptam fxi'zeni' Dxus dxi'pte ewsa'. Txā'wēmeewaça', i'kwe'sx luuçxa' Dxus peeygāanisamée yuutxna. Nawa ewstate íçxáa i'kwe'sx luuçxa' Dxus peeygāanisata'. ¹⁵Nawa Kristo's jxpa'gasamée nmi' ma'k yuu meeçxa' nyu ma'k yuu nawa txutee wēete', wa'lmeete ewna. Txā'wē yu' txuteeya' ājane'kwe, txāa pa'gatey Dxusa' puutx puimée fxi'zewa'ja'sku jxkaaja'. ¹⁶Txā'wē nmi' ma'k yuu meeçxa' nyu ma'k yuu nawa txā'wē peekx nmi'a's Dxus jii knayu'nja sūhna txutemée fxi'zeçxawa, jii yu' meek ya'fxi'ze' Dxusa's jiyuwa'jsamanx jiyuwa'jsameemanx nawa.

¹⁷I'kwe'sx fxi'zewa'ja's ma'wēne' Dxus nvxiht aça' txā'sçxáa kxtey nwēese'jna fxi'zewa'ja' nasa iisa teeçxa na'wēçxah. Nyafxíi i'kwe'sxtxi Dxus pa'yaçte ma'wēsane'kwe yu' na' txā'wēesa mfxi'zewe. Dxusna yaakxsa mteewa pkhaakhesa ūstxna txāawe'sxtxi' txā'wēth jxkaaja'. ¹⁸Maaíi yu'sa' cirkuncidāynisa's wáa Dxus pa'yana aça' txā'wē cirkuncidāyni mneeyūu. Vxite' cirkuncidāynimeesana wáa Dxus pa'yana aça' txā'wēesa mneeyūu ya'cirkuncidāymée. ¹⁹Ya'cirkuncidāy ma'k meeçxa' ya'cirkuncidāymée ma'k nawa txā' kīhwa meesa'. Dxus jxthāasni's kxtey yuuna fxi'zeteçxáa kīhwa yuumeena. ²⁰Nasa iisa ma'wēsaçxah ne'kwe yu' Dxus pa'yaçte', txā'wēesa mfxi'zewe. ²¹Meeçxa'

idxa' vxitee kusete jxkaahni fxi'zena ũste wá' Dxusa' pa'ya aça' txajũ kasehmée fxi'zewa'ja' kuh yajkxmée. Nawa txãa selpinjũ kasejxa' ewuweçxte', mkaaseh txãajũ. ²²Txã'wě Dxusa' Kristo's ũuste jxpa'gaya' pa'yaçte', vxitee kusete jxkaahni fxi'zena ũssaçxawa, açxha' vxitee jxkaahnijũ kasehçxa Kristo's selpisáa i'kwe yuu Dxus dxi'pte. Txã'wěy vxitee kusete selpisamée ma'k yuu nawa açxha' vxitee kusete selpiiya' u'kasa yuuna Kristo tasxte. ²³I'kwe'sxa' Dxus weynisa i'kwe pa'gate. Txãa pa'ga naa kiwete nasaa nwe'sxtxi selpisáa ãhmeekwesatha'w sũhmée mfxi'zewe. ²⁴Txã'wě' naa pa'ga yakhthē'jwe'sx, ma'wěssaçxah ne'kwe yu' Dxus pa'yaçte', nawa txã'wěesa mfxi'zewe nasa iisa teeçxsa na'wěçxah Dxus yakh txutemée.

²⁵Kna'sawe'sxtxi' Dxusa' txã'wěk jxkaaja' jĩwa'j yu' kĩh yuhwa ji'phmeeth. Nawa Dxus yakh ew fxi'zesa yu'kxpehni ewna sũhçxath adx ũus yaakxniju na'wě pta'sxi': ²⁶Piçtakxa' teeçxçxáa yã'j fxi'zeççxa', txã'wěesa fxi'zete ewna sũju'th adxa', naa ensu' fxi'zewa'j wala thēya' txãa pa'ga. ²⁷Nyu ji'phyã'jçxa', txutewa'ja's yaakxnu. Nyu ji'phmeesa', nyu yuuwa'jsa pakweya' yaakxnu. ²⁸Nawa ptamunisa' pkalme', aça' kna'sa ma'k ptamuuya' yajkx nawa txãawa pkalme'. Nawa ptamusa' naa kiwete nxuswa'j thēysa's pejka ji'phutxna, aça' txãatxthu ji'phumeewaça' sũju' adxa'.

²⁹Yakhthē'jwe'sx, na'wě fxi'zewa'ja'sthu pta'sxi': Kuh enmeeçxáa yã'j ũsa'. Naajũyã'ja' ptamçxawa nyu ji'phmée na'wěçxáa mfxi'zewe. ³⁰Nxuswa'j en pa'thewa, nxusmée ũssa na'wěçxáa mfxi'zewe. Naapkaçxha' fxiestate ũssa' weçxana ũssa na'wēmée mfxi'zewe. Kĩh weyni ji'phçxawa txãa weyni' kwe'sx jĩ' sũhmée mfxi'zewe. ³¹Naa kiwete kĩhwa wala ji'phsa' ji'phmeesa na'wěçxáa meswe. Txã'wěme', naa kiwe' pçuuuya'wa'.

³²I'kwe'sxa' peekx yatte thegna fxi'zewa'ja's ji'phmée fxi'zewaç wejx ewna sũju'th. Txã'wě maawa nyu ji'phmeesa' yatte thegwa'ja's yajkxmée Dxus yakh ew fxi'zewa'jçxáanak pa'pçxuna fxi'ze'. ³³Nawa nyu ji'phsa' peekx yatte thegwa'ja'sçxáak jxthaakwe pa'pçxuna fxi'ze', txajx nyu peejxmée fxi'zekahn. ³⁴Txã'wěy u'ywa nmi' ji'phsa vxite' nmi' ji'phmeesa' txã'wěçxaçxáa yajkxna fxi'ze'çmeeta'. Nmi' ji'phmeesa' Dxus jĩiçxá'sku jxthaakwe pa'pçxuna fxi'ze', txajx kakwe txajx ũus yaakxni yã'jçxa Dxus dxi'pte ew fxi'zeya'. Naapkaçxha' nmi' ji'phsa' naa kiwetewe'sxa'sçxáak wejx jxthaakwe pa'pçxuna fxi'ze', nmi' weçxakahn.

³⁵Na'wěth pta'sx nawa i'kwe'sxtxi yupna txã'jçmeeth, wejxwa i'kwe'sxtxi selpiwa'ja's pu'çxnaçxáath txã'jĩ', kxah Dxusa's yuuçxáa wejx thaakwe selpiina fxi'zene'kwe sũhçxath txã'jĩ'.

³⁶Txã'wětewa maafi yu' adx niisa's kmi'a'the wejx ewna. Txã'wěme' e'suyã'ja' iimi'ya' ewumeena sũhna yaakxsa', kmi'al'jane'kwe, i'kwe'sx ũuste ma'wě Dxus kaaũusuthe'jena txã'snaçxáa kxtey yuuna. Mi'çxa

fxi'zeni' pkalsame'. ³⁷Nawa vxite' txã'wē niisa's kmi'a'j wēemeesa', kmi'a'jmeene'kwe txã'sa' kimwa jxkaahmeena aça' kmi'a'jmeeçxa', wejxwa ew yūuna. ³⁸Maawa txã'wē kmi'a'jsa' ew íçxáa yūuna. Nawa kmi'a'jsame' jxthaakwe ew yūuna.

³⁹U'y iimi'sa' nmi' yakh txuteeya' ajameena nmi' nee itxiyte yu'. Txã'sa' leyku txã'wē juuna' jxkaaja'. Nawa nmi' uute yuuçxáa ki' iimi'ya' ajana maa yakhwa, nmi' yuua'jsa Dxusa's jiisa yakh. ⁴⁰Nawa nmi' uuyá'the' peena yu' iimi'meeçxa', wejx wēt fxi'zena. Adxa' txã'wēth yaaki', aça' adxa's Dxus Espiritu ne' kaaūusuthe'je' sūju'th.

Dxus itximeesatx weçxaya' tajkx ikhni's pta'sxni

8 ¹Āçxha' Dxus itximeesa ūsta' txáatx weçxaawa'j tajkx ikhnisa's pta'sxya'wath. Txāa çxiçxa' kīhwa suwwa'jsameetewa txã'sa' ew jiitha'w kwe'sxa'. Nawa txã'wē jiith sūhnisa' weeçx we'wewa'jçxáak kaseje', aça' puutx ya'peeygāhna Dxus yakh çxhāçxha fxi'zewa'j yu' ya'ji'phu'çme'. ²Maawa txã'sçxáana jiiçxa jiith sūhna fxi'zesa', kīhwa jiimeeta' ew jiisa na'wē yu'. ³Nawa txã'wē yūumée, Dxusa'sçxáa ūsuh jxuka yaakxa's Dxusa' jiiia' txã'wē yūusa's.

⁴Txã'wē dxus itximeesatx weçxaya' tajkx ikhnisa çxiçxa's ū'te çewmée dxihmanx? Ew ūs miijajkxwe. Txāa dxus itximeesa' naa kiwete kīh yuhwa meesata', naasáa teeçx Dxus yuuçxáa itxisa ūsa', peena vxite yu' meeta'. ⁵Dxus yaasesa naa kiwete vxite' cielute ūswáatxna txã'wē yaakxa yakh yu'. ⁶Nawa kwe'sx yakh yu', teeçx Dxus yuuçxáa ūsa' kwe'sx Tata cielute ūssa. Txāak kīh yuhwa peejxmée jxuka taki'jçxa nvxiht, aça' kwe'sxa' txāa pa'gaçxáatha'w itxi fxi'zeya' aja'. Txã'wēy kwe'sxtxi jxpe'jsawa teeçxçxáa ūsa', txã' Jesukristo'. Kīhwa jxuka txajx thegna jxpe'pha'gaçxáa ūsta', txāa pa'ga kwe'sxwa txajx jxpe'jnisa íçxáatha'w.

⁷Aça' txāa yakh ūssa yakha' çxiçx txã'wēsa's ū'tewa, kīh yuhwa suwwa'jsameetewa txã'sa' jiimeeta' jxuka yu'. Txāasatx naa kiwete dxus itximeesatx nyafxíi neewe'wesawe'sx Dxusa's açxamée ew jiisa' çxiçx txã'wēsa's ū'te', ewmeena sūju'. ⁸Nawa kwe'sx ū'ni' Dxus dxi'pte ewsa vxitwa'jsame'. Aça' txã'wē ū'çxa' ewsawa yuume'nja'w, sa' ewmeesawa yuume'nja'w. ⁹Txã'wētewa, mpa'yajkxwe, i'kwe'sx txã'wē kīhnawa ū'ya' aja'nja'w sūhçxa txāa çxiçxa's ū'pa'gaçxáa Dxusa's açxamée ew jiisatx pkalte kweete'jwe'sxte. ¹⁰Meeçxawa na'wē wáa yuune'ga: dxus itximeesatx weçxanisa çxiçx txweyni's wáa ū'ya' kaçxhiine'ga, aça' Dxusa's açxamée ew jiisa uyçxa', txāawa txã'wēy ū'wena. ¹¹Aça' iidxpagaçxáa Dxusa's açxamée ew jiisa iidx yakthē'j ūusa' vxituna, txajx pa'gate makwe Kristo uutewa. ¹²Aça' Dxusa's açxamée ew jiisa yakthē'jtx pkalte kweete'jçxa', idxwa Kristo dxi'pte yuuwesa yuune'ga. ¹³Txāa pa'ga adx yakthē'j pkalte wetewe'sxte çxiçx txã'wēsa's bagaçxte yuhwa ū'me'nja pkalte kweete'jya'mée.

Jesukristo jxkaahnisa' ũ'wa'ja's jxuka pëywa'j ji'pha'

9 ¹Adxa' Jesus jxkaahnisatewe'sxthu, naa pa'ga sãljĩni's jxuka pëywa'j ji'pthu, txãa pa'gatey kwe'sxtxi jxpe'jsa Jesusa's iuuythu, sa' txajx tasxte mjĩith aça' adx mjũĩçxa Jesus tasxte kuutxa'jnisa i'kwe i'kwe'sxa'. ²Vxitesa adxa's we'weçxa': Pablo' Jesus jxkaahnisatewe'sxme' jĩsawa ũswáatxna. Nawa i'kwe'sx yu' txã'jĩya' ajameene'kwe. Adxa' Jesukristo jxkaahnisatewe'sxte fiçxãa i'kwe'sxa' Jesukristo's nwëese'jsa i'kwe adx pta'sxte.

³Adxna nuywe'wesatxi' na'wëth pasu': ⁴Adxa' ũ'wa'ja's jxuka pëjxya' ajawa'jsath. ⁵Ma'wëta Jesukristo jxkaahnisawe'sxwa txãawe'sx nyuutx pe'jçxa sãljĩni fxi'ze' vxite' Jesus nyakh, Pedrowe'sxwa, aça' adxçxãa çkĩh yũuçxa txã'wëy yũuya' ajamée yuuki'th? ⁶Bernabé yakh kwe'sx e'zsaçxãa wãa Dxus yuwe's pta'sxna u'juçxawa çnaa kiwete mjĩia's nvxiitwa'jsamée ne'tka'w? ⁷çMaa soldauçxã' sãljĩnimée fxi'zegá'? çKimga uuthasx vxitçxa', kxtee yũnni's ũ'we'çmée? çKimga kla taki'jçxawa txãa klaa leçxi's tudxi'çmée? ⁸Adx ũusuhçxãa txã'wë yajkçxã we'we'çmeeth. Txã'wëmeete fík Moises leytewa txã'jĩ'. ⁹Kxteea' na'wë fxi'jni': Bweya's kmaaji'jĩçxa', yuwe's tudwa'jme' iĩu' mjĩikahn jĩ'k. Dxusa' txãa bweyçxãatx peeygãhçxa txã'wë we'weme', ¹⁰wejxwa kwe'sxtxi we'weçxak txã'jĩ', txãa pa'gatey txãa leya' kwe'sx jũik yu' naa pa'ga. Txã'wë uuthasxsu mjĩisa ma'k yuu meeçxa' kiwe's wuwsa ma'k yuu nawa kxtee mjĩini's kutxi'jçxa ũ'we'nja sũhnak mjĩ'. ¹¹Txã'wë yã'the', kwe'sxwa i'kwe'sx xsxavxysu Dxus jĩ mjĩisatha'w aça' i'kwe'sxa' miijaykxwe çkwe'sx mjĩipa'ga ũ'wa'j kĩhçxãawa jxpa'gawa'j ji'phmeemtha'w? ¹²Vxite mjĩisawa ũ'wa'ja's jxpa'gane'ta aça' çkwe'sx yu' wejx txã'wë jxpa'gawa'jsameemtha'w?

Txã'wëçxawa kwe'sxa' mjĩipa'ga ũ'wa'ja's iipëjxmeetha'w, wejxwa kwe'sx peejini's wantaĩ'tha'w, Kristo kaapiya'jni's yupsá na'wë yuuya'mée. ¹³I'kwe'sxa' jii i'kwe dxuus yatte mjĩisa' dxuus yatte ũ' yakhtxi fxi'ze'. Txãawe'sxa' na'wëtx yu': altalte pu'çxsa' kxtee niimal ikhni çxiçxa'stxi ũ'we'. ¹⁴Kristowa txã'wëyçxãak jxkaaja': Dxus yuwe pta'sxsa txãawe'sxa' kxtee sãljĩni fxi'zewa'j ji'phta' jĩ'k. ¹⁵Nawa adxa' bagaçx yuhwa iipëjxmeeth txã'wë sãljĩwa'ja's, sa' i'kwe'sx kĩhçxãawa peeskahn txã'ljĩna fxi'jaçmeeth. Kĩhwa sãljĩmeetewa wëththu fxi'ze' na' txã'wë i'kwe'sxtxi thãasmey uuwa'jsath.

¹⁶Adxa' Dxus yuwe's pta'sxpa'ga iijwejçx yaakiçmeeth, txãa mjĩia' adx jĩime', Dxus jĩ' txãa pa'ga. Aça' Dxus yuwe's pta'sxmeeçxa', wala yuh seena' yuuwesa yu'nja. ¹⁷Txã'wë dukh jxthãasçxa mjĩi pakwewaça', txãa mjĩipa'ga jxpa'gawa'j ji'pthu sũju'nja. Nawa txã'wë yajkçxã mjĩinisa yu'çme'. Txãa mjĩia's Dxusku ũs, aça' txajx jxkaahniçxã's kxtey yuuwal'j ji'pthu kĩhwa dukh jxthãasmée. ¹⁸Dxus yuwe's wët weçxana pta'sxni

adx yakha' dukhni na'wësa', aç'a' adx mjüipa'ga i'kwe'sx yuutxi's dukh jxthãasu'çmeeth.

¹⁹Txã'wë adxa' dukh jxthãasmée üsthu, aç'a' adxa's kim yuhwa jxkaahwa'l j'i'phmeeta'. Nawa Kristo tasxte nasa kuh nuypa'l'ya' sühçxa yuuçxáath selpisáa yuu jxukaysatx. ²⁰Bagaçxtewa judiuwe'sx yakh üsçxa', judiu na'wëythu yu', txãawe'sxtxi Kristo jüi knayya'. Adxa' Moises leya's nwëese'jeçíi yu' meeçxawa Moises leya's nwëese'l'jsa yakh üsçxa yu', txãa leya's nwëese'l'jsa na'wëythu yu', txãawe'sxtxi Kristo jüi knayya'. ²¹Sa' vxite nasa Moises leya's jiimeesa yakh üsçxa', adxwa txãawe'sx na'wëythu jüi knayya' fxi'ze' makwe Dxus leya's yu' nvxihtmée üsçxawa, txãa pa'gatey Kristo jxkaahni'sthu nwëese'l'jna fxi'ze'. Nawa txãawe'sxtxi Kristo jüi knayya'çxáath txã'wë yü'. ²²Dxusa's açxamée ew jiisa yakh üsçxa', adxwa txã'wë yüi jüimeekwesa na'wëth fxi'ze'. Nasa ma'wëkwesate', adxwa txãawe'sx na'wëythu fxi'ze', txã'wë yüute' maaçxáawa ewte neeyüwa'l'ja's uyuwáatxna sühçxa. ²³Txãasath kïhtewa jxuka txã'wë yüuna fxi'ze', Dxus yuwe ewsa's vxitetxwa jxtxuhdeya'.

²⁴I'kwe'sxa' peekx jüi i'kwe wuwuuçxa knay wëesa' kxazíi ja'daçxahntx wuwu', peeswa'l' üsna txã'sna knayya'. Nawa teexsa yuuçxáak knayu'. Txãa knaysawa ma'wëga çxhãçxha wuwu', i'kwe'sxwa txã'wë yüi myüuwe, peeswa'l' üsna txã'sna jxpa'gaya'. ²⁵Maawa wuwuuçxa knay wëesa' txãawe'sx kakwe's kaapiya'l'jna pheu'ju'tx yaçkhëy. Txãawe'sxa' naa kiwete korona pçuwa'l'jsa's jxpa'gaya'çxáatx txã'wë yü'. Nawa kwe'sxa' bagaçxte yuhwa pçuwa'l'jsame's jxpa'gaya'tha'w txã'wë pa'pçxu'. ²⁶Adx txã'wë yüuççxa', ma'wë wuwuwa'thewa jüimée yu' wuwuume'nja. Adxa' puiiya' jüimeesa na'wë fxiisuçxáa ujcame'nja. ²⁷Txã'wë yüuya'mée, adx kakwe's kaapiya'l'ja'th. Txã'wëme', vxiteçxáatx ew kaapiya'l'çxa', kaapiya'l'jsa adx yu' seelpimeesa yuuya'mée.

Dxus ïtximeesatx neewe'wekahmen yu'kxpehni

10 ¹Yakhthë'l'jwe'sx miiyajxkwe: nyafxiitey kwe'sx yaçgawe'sxa' jxukay Dxus nwe'wena jxpe'l'jni tãaph aphnitx fxi'zena üsu', sa' jxukay ikhwala bejuywa ew uykhëwtxi. ²Jxukay Moises yakh txutemée fxi'zeçxa yuuçxáatx jxukay tãaph dxiite Dxus nwe'weni yuu, sa' txã'wë yüi ikhuywa uykhëwtxi, ³sa' jxukaysatx Dxus sã'l'jini fxi'zena üsu'. ⁴Txã'wëythu jxukaysa Dxus yusni yu'a'swa tudxna fxi'zena üsu', sa' Dxusa' txãawe'sx yakh ih dxi'the pi'kxna u'l'jweççxa', penxate yu' kutxi'l'çxa yusku. Aç'a' txãa penxa yu' Kristok yu'. ⁵Txã'wë Dxusa' ew yüutewa, nasa wejx kuhsa yu' Dxus dxi'pte ew fxi'zemeeta', txãa pa'ga Dxus kastigäyte uutx nasa u'pnimée kiwesu.

⁶Txã'wë kastigäyini uutx nawa txãa yu' kwe'sx jxpa'yajxçxa txãawe'sx na'wë yüi ewmée yüukahmençxáak txã'wë yüi. ⁷Txãa pa'ga i'kwe'sxa' dxus ïtximeesatxi' neewe'wenuwe, txãawe'sx na'wë yu'. Txãawe'sx dxus

ĩtximeesatx neewe'weni's na'wĕk pta'sxi' Dxus libru': Nasa' weçxana fxiesta'jya' takhtxi ũ'na tudxna jĩ'k. ⁸Txāawe'sx na'wĕ ptamsamée kazx pkal yuuwa'lj ji'phmeetha'w. Txā'wĕ yūusa' uutx teeçx enteçxáa weintitres mil nasa. ⁹Kxtee ũssa maafi yu' Dxusa's juuna' ũusçxawe'wetx, aça' txā'wĕ we'wepa'ga ul weesweesa wa'kxte uutx. Nawa kwe'sxa' juuna' we'wewa'lj ji'phmeetha'w Dxusa's. ¹⁰Maaafi yu' Dxusa's açewe'wetx ewmeek yūu jīna. Aça' txā'wĕ we'wepa'ga, Dxus kaahni angel txāawe'sxtxi' ivxiituk. Nawa kwe'sxa' txā'wĕ açewe'wewa'lj ji'phmeetha'w.

¹¹Txāniitey kwe'sx yaçgawe'sxtxi txā'wĕk yūu, aça' txā'sa' Dxus librote fxi'jnik neeyūu kwe'sxwa jxpa'yakx fxi'zekahn, nmeh ensa' utxaana u'jweça' txāa pa'ga. ¹²Txā'wĕ Dxus yakh ew ũsthu sūhna yaakxa' jxpa'yakxwa'ja' pkalte weteya'mée. ¹³I'kwe'sxtxi pkalte pĕtxwa'jsa pa'ja'ne' txā' u'sesa thaakwe seena' thĕysameeta', jxukaysa txā'wĕsaçxaxçáatx ji'phusatha'w. Nawa Dxusa's pi'kine'kwe aça' txā' i'kwe'sx wantäyya' çxhāçxhawa'jmeesa yu'sa' kaavxya'ja'jmeena, wejxwa pkalte pĕtxwa'jsa pa'jaçpkaçxha', ma'wĕ txāa pkaluh iyuwa'ja'swa ih pu'çxhina Dxusa'.

¹⁴Txāa pa'ga yakthĕ'jwe'sx, dxus ĩtximeesatx neewe'wenijū kasejkahn yu'kxpehni's mwĕese'jwe: ¹⁵I'kwe'sxa' peekx jii i'kwe adxa' kīh yuupa'ga ne'tka txā'wĕ jxkaaja' nawa adx we'weni's mpa'yajkxwe. ¹⁶Ūus miiyajkxwe: Kristo' uuççxa' txajx eea's pkawku aça' txāa uuni's kaayaki'jsa wasotewe'sxa's jxpa'gaçxa ora'i'tha'w. Txā'wĕ yūunisa' Kristo' yakh utxaaçxa txāa yakh txutemeetha'w fxi'ze' jīnisa'. Txā'wĕy Kristo' uuya' txajx kakwe's dukhku aça' txāa uuni's kaayaki'jsa pana's pe'ltedeçxa jxtxude'tha'w. Txā'wĕ yūunisa' Kristo' yakh utxaaçxa txāa yakh txutemée ihtha'w fxi'ze' jīnisa'. ¹⁷Makwe wala kuhçxawa teeçx pana'sçxáa jxukaysatha'w ũ'we', txāasatha'w teeçxçxáa na'wĕsa yuuna pa'ja'.

¹⁸Miiyajkxwe Israelwe'sxtxi. Txāawe'sxa' Dxusna weçxaya' tajkx ikhni çxiçxa's ũ'sa' Dxus yakh txutemée fxi'zesaçxatx txā'wĕ yū'. ¹⁹Txā'jīte', txā'wĕ yūuya' tajkx ikhnisa çxiçxte kīh pĕethejene' sūjkahn txā'jīçmeeth, txāa pa'gatey dxus ĩtximeesa' kīhwa meesata'. ²⁰Txā'wĕtewa, dxus ĩtximeesatx weçxaya' tajkx ikhe'tx Dxus cielutewe'sxa's jiimeesa', aça' txā'wĕ yūuni' dxus ĩtximeesaçxáatx weçxanisame', eçxthĕ'ja's weçxanisa'. Aça' i'kwe'sxa' txā'wĕ eçxthĕ'j yakh utxaaçxa fxi'zenuwe jīçxath txā'wĕ we'we'. ²¹Txā'wĕ eçxthĕ'j yakh utxaaçxa weçxana ũsçxa', Kristo' puuçni mesatewe'sxa's yu' jxpa'gaya' ājameene'kwe. ²²Kwe'sxtxi jxpe'jsa Jesukristo's kaaūusçxa'jwa'jsameetha'w kwe'sxa', txāa pa'gatey txāate jxthaakwe çxhāçxhasameetha'w naa pa'ga.

**Kīhnawa ũ'ya' ājawa'jsatha'w, nawa
jxpa'yakxwa'ja' vxitetx peeygāhçxa**

²³Isa kwe'sxa' kīhnawa ũ'ya' ājawa'jsa yuhtha'w, nawa jxpa'yakxwa'lj ji'ptha'w. Makwe kīh ũ'nawa ũ'ya' āja'nja'w nawa txā' Dxus yakh

çxhâçxha fxi'zewa'j yu'sa' pu'çxhi'çmeeta'. ²⁴ Peekx fxi'zewa'jçxá's yajkxmée, vxitetxwa peeygāawa'ja' ew kfxi'ze'jya'.

²⁵ Merkaute çxiçx ma'wēsanawa weyçxa maa sūhmée ū'wa'ja', ²⁶ txāa pa'gatey Dxus jiiçxaçxáata' naa kiwe, txā'wēy naa kiwete ūssa kījkihwa jxuka.

²⁷ Meeçxa' Dxusa's jiimeesa pi'kxte', i'kwe'sxa' u'lçxa kīh puuçtewa txā'sa' ū'weçxáane'kwe maa sūhmée. ²⁸ Nawa Dxusa's açxamée ew jiisa' na'jīna we'wena: Naa çxiçxa' dxus itximeesatx weçxanisa' na' ewmeena jīte', idxa' txā'sa' ū'meene'ga, txā'wē pta'sxsa's kaypuba'jya'mée. ²⁹ Vxitesa ūus yaakxni's jxpa'yakxkahnthu we'we', iidx ūus yaakxni's we'weçmeeth.

Nawa Dxusa's sxiigmée ew jiisa' na'wē pēyina: Adx kīhnawa ū'ya' ājani's çkīh yūuçxa vxitesa neeweya' ājakk? ³⁰ Adxa' kīh ū'weççxawa Dxusa's weçxana orāyçxath ū'we', aça' adx ū'ni's çkīh yūupa'ga ewmée nuywe'wetxki? jītxna. ³¹ Ew yuja', nawa i'kwe'sx ū'nisa ma'k yuu kīh yūuççxawa Dxus dxi'pte selpiiwa'jsaçxá's thegçxa kxtey myūuwe. ³² Judiuwe'sx vxite' judiimeesa, meeçxa' Dxus luuçx maatxwa kaypuba'jwe'sxte' mpa'yajkxwe. ³³ Adxa' na'wēçxáath pa'pçxu': peekx wēt fxi'zewa'j yu's yajkxmée, vxitesatx pu'çxwa'ja'sçxáath pakwena fxi'ze', txāawe'sx ūusa' ewte neeyūukahn.

11 ¹ Adxwa ma'wētka Kristo fxi'zeni's thegçxa fxi'ze', txā'wēy i'kwe'sxwa adx fxi'zeni's thegçxa mfxi'zewe.

U'ya' kultote jxpa'yakxwa'j ji'pha'

² Yakhthē'jwe'sxtxi weçxa'th adxa's peçxkanamée yajkçxax adx kaapiya'jnitxi' kxtey yuuna fxi'zepa'ga. ³ Nawa na'wēsa'swa mjiyuwe: Kristo' Dxusa's nwēese'jsa', aça' piçthē'jwe'sxa' Kristo's nwēese'jwa'jsata', aça' u'ywe'sxa' nmi'tx nwēese'jwa'jsata'. ⁴ Txā'wē yūuwa'jsaçxah maa piçthē'jwa çxua'a's ki'pmée kultote orāyna Dxus yuwe's pta'sxna ūsçxa', Kristo's weeçxsa yuuni'. ⁵ Txā'wēy maa u'ywa dxikthe's ya'pathmée orāyna Dxus yuwe's pta'sxna ūsçxa', txajx nmi'a's weeçxsa yuuni'. Txā'wē ya'pathmeete', dxkhasa's kwaaka'jni na'wēsa'. ⁶ U'ya' txā'wē ya'patheçmée yā'lçxa', teehwed dxkhasa's tee kwaaka'j. Nawa u'y txā'wē dxkhasa's kwaaka'the' thaameweçxte', tee ya'path txajx dxikthe's. ⁷ Piçthē'ja' dxikthe's ya'pathwa'jsame', txāa pa'gatey Dxus wedxçxak txāa na'wēysa vxit, txajx jxkaahnitx nwēese'jwa'jsa. Naapkaçxha' u'ya' piçthē'j jxkaahnitx nwēese'jwa'jsa'. ⁸ Dxusa' piçthē'ja's taki'jiççxa', u'y kakwejuwe'sxa's kutxi'lçxa pheuljme', wejxwa piçthē'j kakwejuwe'sxa's kutxi'lçxak u'ya's pheulj. ⁹ Piçthē'ja' pu'çxwa'jsa peejku yu', txāa pa'gaçxáak u'ya' pheuljni yuu. U'y txā'wē pu'çxwa'jsa peejxte piçthē'ja's pheuljni yuume'. ¹⁰ Txāa pa'ga u'ya' piçthē'ja's nwēese'jwa'jsa' jīni dxikthete ya'pathnisa ji'phuwa'ja'. Txā'wē ya'pathwa'jsaçxah kxtey yuumeete', Dxus angeleswe'sx thegna ūsta'. ¹¹⁻¹² Txā'wētewa, ew ūus

yajkxte yu', maa yuhwa thaakwesameeta', txāa pa'gately piçthē'jwaçwa u'y kakwetemée peekxçxāa yu' naa kiwete upxya' āja'çme', txā'wēy u'ywa piçthē'j ji'phmée peekxçxāa yu' naa kiwete upxya' āja'çme'. Isa yuja' u'ya' piçthē'j kakwejuwe'sxa'sku pheu'jni yuu, txā'wēy piçthē'jwa u'y kakwetek upxya' āja'. Txāasa maa yuhwa thaakwesamée, e'zīi Dxus pheu'jniçxaçxāata'.

¹³ Txā'wē' naa pa'ga i'kwe'sx pwe'sx ūus miijajkxwe, aan ewna txā'wē Dxusa's orāiççxa u'ya' dxikthe's ya'pathmeete. ¹⁴ Piçthē'ja' peekx yuu dxkhas jxu'j ji'phuwa'jmeesaçxa txā'wē khyu'ja'the', thaame yuja'. ¹⁵ Nawa u'y txā'wē dxkhas jxu'j ji'phte', zhiçkwesa'. Txāa pa'gately dxikthe's aphwa'jīiçxāak dxkhas jxu'j nvxiitni yuu. ¹⁶ Nawa maafi' yu' dxikthe's ya'pathwa'ja's jxkaahni's wa'lsa ūsçxa', peekx ūus yaakxwa'j ji'phta'. Txā'wēme' kwe'sx vxite' Dxus luuçx msuuwe'sx maa yuhwa jiimeeta' dxikthe's ya'pathmée Dxusa's orāyini yu's.

Ewmée yūuya'çxāa Santa Cena's ū'ya' pkhaakheni

¹⁷ Na'wēsana pta'sxna fxi'jaççxa', i'kwe'sxa' ew yūusa i'kwe jīna weçxaya' āja'çmeeth. I'kwe'sxa' Dxusa's weçxaya' pkhaakheni' selpiipkaçxte, wejx suwsaçxāana sūju'th. ¹⁸ I'kwe'sxa' Dxusa's weçxaya' pkhaakheççxa', bagaçxtewa i'kwe'sx pwe'sx puutx fxiifxii txuteeya'çxāatx pkhaakhe' jī'tx aça' txā'wē pta'sxni' isa yuhna sūju'th. ¹⁹ Pkhaakhesa i'kwe'sx pwe'sx txā'wē fxiifxii txuteni' ew yuhna, txajīiçxāa mtee pkhaakhesa wejx Dxus yakh ew fxi'zesatewa ya'jijyuna. ²⁰ Nawa Jesukristo mesatewe'sxa'stha'w jxpa'ga' jīççxa txā'wē fxiifxii txuteeçxa ūsni' txā' Dxus jxthāasnime'. ²¹ Txāa pa'gately i'kwe'sxa' ih pkhaakheçxa ja'daçxah ū'wa'j en ājaçpkaçxha', puutx fxii txuteeçxa maafi' yu' yaçte ū'we'i'kwe, vxite jīi yu' nvxihtmée. Aça' vxiteçxāa txikpkaçx meeçxawa tūunus tudxte', vxite yu' ū'wa'j ji'phmeetx wēena neeyū'. ²² Txā'wēçxāa yūuççxa', i'kwe'sx yat-suywa ū'wa'jna. Txā'wēme', vxitee ū'wa'j yu' nvxihtmeeçxa', kxūusu'ju'i'kwe, aça' puutx yaaçeniçxāak kaseje'. I'kwe'sx txā'wē yūuna ūste', adxa' i'kwe'sxtxi' ew yūuna ūsi'kwe jīna çweçxaya' ājama'th? Na'wēçxāa yūute', weçxaya' ājame'nja.

Santa Cena's ū'wa'ja's Kristok kaapiya'jçxa nvxiht

²³ Adxa' i'kwe'sxtxi' kaapiya'th nawa Jesukristo adxa's ma'wē kaapiya'the' txā'wēyçxāath kaapiya'j txā' na'wē': Jesusa's ikhkahn dukhwa'j kus ājaçte', txāa kusuçte pana's kusete jxpa'gak. ²⁴ Sa' Dxusa's weçxana orāyçxa', pe'ltedeçxa na'jīk: Mē'we. Naa pana' adx kakwe's i'kwe'sx pa'gate pe'ltedenisa na'wēsa'. Txā'wē myūuwe adx pxthaa yuuçxa uuni's bagaçxtewa yajkxya'. ²⁵ Ū'na jxā'jçxa', txā'wēy waso's jxpa'gaçxa na'jīk: Adx eea's pkawçxa yuuçxāa i'kwe'sxtxi' nwe'wewa'ja's Dxusa' u'se pheu'jçxa nvxihtku. Aça' naa wasotewe'sxa' adx ee i'kwe'sx

pa'gate uwusáa na'wésa'. Txã'wê tudx iisa adx pxthaa yuuçxa ee pkawni's bagaçxtewa kaayaki'jwa'jsa' jînak kaapiya'j. ²⁶Txã'wê yã'the', bagaçxtewa naa pana's û' iisa, naa wasotewe'sxnawa tudx iisa i'kwe Jesukristo uuni's yajkxna nes yu', txãa sxawedna kîhpkaxç.

Santa Cena's jxpa'gaya'waçxa' na'wê yûuwa'ja'

²⁷Txã'wê maawa Jesukristo kaapiya'jni's kîhwameesa na'wê Dxusa's yajkxmée maa sühmée wáa pana's û'na wasotewe'sxnawa tudxiitxna aç'a' txã'wê yûusa' pkalte wetesá yuutxna, txã'wê Jesukristo kakwe vxite' txajx ee na'wésa's kîhtewa seelpimeesa na'wêçxáa yûupa'ga. ²⁸Txãa pa'ga úus miiyajkxwe teeçxsa na'wêçxah pan vxite' wasotewe'sx txáatx jxpa'gamey. ²⁹Txã'wême' nxuste wetewa'ja's peekíi pakwesáa yuutxna, txã'wê Jesukristo kakwe vxite' txajx ee na'wésa txáatx kîhtewa seelpimeesa na'wê maa sühmée jxpa'gapa'ga. ³⁰Txã'wê jxpa'yakxpa'gamée i'kwe'sx ksxavxytewe'sx maaíi yu' aç'a'na çxhãçxhamée ústa', naapkaçxha' vxite' uuna ústa'. ³¹Peekíi wala jxpa'yakxna fxi'zewaça', txã'wê nxuste wetewa'j en pa'jmeena. ³²Nawa Dxusa' kwe'sxtxi peeygãhçxak kastigo kaja', ki'kin txã'sna pakwete', bagaçxte yuhwa Dxus yakh puutx uywa'jmeesawe'sx yakh kaajxa'mée.

³³Na'wê' aç'a' açxha' adx yakthê'jwe'sx, Jesukristo mesatewe'sxa's û'ya' pkhaakheçça', teeçxsa na'wêçxah puutx ya'peeygãhna ja'daçxah û'ya' müythaswe. ³⁴Maaíi yu' wala wéesa úçça', txajx yatte û'wena, txã'wê puutx ya'peeygãhmée pkhaakheté', Dxus kastigãywe'sxte. Vxite yuwe ústa' txáatxi's adx pa'jçxa pheu'ju'nja.

Dxusna selpiwa'ja's Dxus Espiritu' nasa iisa fxiyfxiyçxah úsni

12 ¹Na'wê Dxus Espiritu' nasa iisa fxiyfxiyçxah Dxusa's selpiiya' jãjawa'ja's úsu'k txã'sna pta'sxya'wath, aç'a' yakthê'jwe'sx jxpa'yakx mwéese'jwe.

²I'kwe'sxa' ew jii i'kwe Dxusa's jiyumeçça', naa kiwete dxus ítiximeesatx i'kwe nwéese'jna fxi'ze'. ³Txãa pa'ga açxha' ew mjiyuwe: Jesusa' seena' ewmeesa' jîna açewe'wesa' Dxus Espiritu kwe'we'the we'wesameena. Sa' txã'wêy Jesusa' adxna jxpe'jsa' jîna we'wemeena kim yuhwa, txã'wê Dxus Espiritu kwe'we'jmeete yu'.

⁴Kîhwa yûuya' jãjawa'j ústa', aç'a' nasa' txáatx jxpa'gatxna. Nawa txãa jãjawa'jtx ússa yu', Dxus Espiritu teeçxçxá'. ⁵Ma'wêwa selpiwa'j ústa', aç'a' nasa iisa makwe fxiyfxiyçxah selpiiççxawa, teeçx Dxusçxáanatha'w selpi'. ⁶Ma'wêwa fxiyfxiyçxah mjíiwa'jwa ústa', nawa teeçx Dxus yuuçxáak fxiyfxiyçxah mjíiwa'ja'swa kaapiya'ja'. ⁷Nasa iisa fxiyfxiy selpiwa'ja's Dxus Espiritu' jxukaysatx peesu'sku, nasaa nwe'sxtxi pu'çxna fxi'zekahn. ⁸Dxus Espiritu' maaíitxi' Dxus yuwe's jxpubamée jiyuya' jãjawa'ja'sku úsu'. Txãa Espiritu' íiçxáa maaíitxi' ma'wêwa yu'kxpejxa'

ājawa'ja'sku ūsu'. ⁹Txāa Espiritu iīçxāa maaīitxi' Dxusa's ūuste jxpubamée yaakxwa'ja'sku ūsu'. Vxitetxi's āça'satx nuyçxhāaçxhawa'ja'sku ūsu'. ¹⁰Maafī yu' kim yuhwa ājanimeesa's ājawa'ja'stxi jxpa'ga'. Sa' vxitetxi's Dxus kīh yūuya'watewa dxiikhēy jiyuçxa pta'sxya' ājawa'ja'sku ūsu'. Vxitetxi's maa txā'wē Dxus Espiritute!, vxite! maa Dxus Espiritumeetewa jiyuwa'ja'sku ūsu'. Aça! vxite! jxpa'ga'tx yuwe fxiysaju we'weya' ājawa'ja's, naapkaçxha' vxite! txāa yuwe fxiysaju we'weni's āate pta'sxya' ājawa'ja'stxi jxpa'ga'. ¹¹Nawa txā'wē nasa iisa fxiyfxiy selpiiya' ājawa'ja's ūssa' Dxus Espiritu teeçx yuuçxá'. Txāa yuuçxáak teeçxsa na'wēçxah kīh mjīiya' ājawa'jsatewa txāatx ūsu'.

Jxukaysa teeçxsa kakwetewe'sxçaxçáatha'w

¹²Kakwewa ma'wē teeçxçxáaçxawa kuh jwed ji'phna fxiyfxiysa, aça' Kristowa txā'wēysa'. Makwe kuh jwed fxiyfxiysaçxawa, kxazí teeçx kakwetewe'sxçxáata'. ¹³Dxus Espiritu txā'wē kwe'sx ma'wēsaxwa Kristo tasxteçxaxçáa kuutxa'the!, teeçx kakwetewe'sxçxáatha'w yuu. Judiu ma'k yuu meeçxa' judiumée ma'k yuu, selpiisáa ma'k yuu meeçxa' selpiisamée ma'k yuu nawa txāazkuéesay Dxus Espiritu teeçxçxáa ūsa' txāaçxaxçá'stha'w jxpa'ga' jxukaysa.

¹⁴Kakwe' teeçx jwedsa yakhçxáa kakwe yuuna pa'ja'çme'; wala kuh jwed ji'pha'. ¹⁵Çxida' we'wewaça', na'jīna: Adxa' kusemeeth, sa' txāa pa'ga kakwetewe'sxmeeth jīna nawa txā'wē kusemeeçxawa kakwetewe'sxíçxá'. ¹⁶Meeçxa' thū'wē' we'wewaça', na'jīna: Adxa' yafxmeeth, sa' txāa pa'ga kakwetewe'sxmeeth jīna nawa txā'wē yafxmeeçxawa kakweteywe'sxíçxá'. ¹⁷Txā'wē kakwe' jxuka yafxçaxçáawaça', ¿ma'wē wēse'jya' ājakxtha'w? Meeçxawa kakwe' jxuka wēse'jnisaçxaxçáawaça', ¿ma'wē jxputaya' ājakxtha'w? ¹⁸Nawa Dxusa' kwe'sx kakwetewe'sx kuh jwedku ki'p, kīhçxahne' peejx yu' txāatxi' jxuka. ¹⁹Teeçx jwedsaçxáawaça', ¿ma'wē kakwe' selpiiya' ājakx? ²⁰Txā'wē kakwetewe'sxa' kuh jwedsaçxawa teeçx kakweteçxaxçáatx jxukaysa selpi'.

²¹Yafxa' kuse's we'weçxa': Idxa'sa' jxpeejxmeeth ¿jīya' ājama'k? Txā'wēy dxikthewa çxidatx we'weçxa': Idxa'sa' jxpeejxmeeth ¿jīya' ājama'k? ²²Txā'wēmée wejxwa kakwetewe'sx kīntewa seelpimeesa na'wēçxawa, txāaíçxáa jxthaakwe jxpeejsata'. ²³Kakwetewe'sx jxthaakwe yu' peejinimeesawa ūsta', makwe txā'wētewa txāatxwa jxpa'yaki'tha'w. Sa' txakwe zhiçxkwe pheu'jna jxpe'jwa'lmeesa'swa ewtha'w pheu'ju', jxthaakwe yu' peejxmeesa na'wēsatewa. ²⁴Dxusa' txā'wēk jwee peejxmeesa na'wēsaxwa ki'pna kakwe's pheu'j, txāaíçxáa jxthaakwe selpiwa'jsa. ²⁵Txā'wē kakwetewe'sxa' puutx yahçemée kxaazkuēy ja'daçxah puutx ya'pu'çxwa'jsata'. ²⁶Kakwetewe'sx teeçx jwedsa pxthaa yuuçte!, vxitewa jxukaysa nxus pu'çxhi'tx. Kakwetewe'sx teeçx jwedsa peeygāni yuuçte!, vxitewa weçxweçxatx yaakx pu'çxhi'.

²⁷Āçxha' mjiyuwe: i'kwe'sxa' nasa iisa teeçxsa na'wëçxah Kristo kakwete selpiisáa i'kwe. ²⁸Txãa pa'gak Dxusa' txajx luuçtxxi' fxiyfxiy selpiwa'ja's peesu's teeçxsa na'wëçxah: Nyafxtewe'sxa' Kristo jxkaahnisawe'stxxi yuu. E'stewe'sxa' Dxus kîh yûuya'watewa dxiikhëy jiyuçxa pta'sxwa'jsatx nvxiitni yuu. Tekhtewe'sxa' kaapiya'jwa'jsatx nvxiitni yuu. Txajû' kim yuhwa âjanimeesa's âjawa'jsatx nvxiitni yuu. Naapkaçxha' vxite' âça'satx nuyçxhãaçxhaya' âjawa'jsatx nvxiitni yuu. Vxite' kîhteçxáawa pu'çxya' âjawa'jsatx nvxiitni yuu. Vxite' jxkaahwa'jsa nvxiitnitx yuu, naapkaçxha' vxite' yuwe fxiysaju we'weya' âjawa'jsatx nvxiitni yuu. ²⁹Jxukay yu' Kristo jxkaahnisatewe'sx yuumeeta'. Jxukay yu' Dxus kîh yûuya'watewa dxiikhëy jiyuçxa pta'sxsxa yuumeeta'. Jxukay yu' kaapiya'jsa yuumeeta'. Jxukay yu' kim yuhwa âjanimeesa's âjawa'jsa yuumeeta'. ³⁰Jxukay yu' âça'satx nuyçxhãaçxhaya' âjawa'ja's jxpa'gasa yuumeeta'. Jxukay yu' yuwe fxiysaju we'weya' âjawa'jsa yuumeeta'. Jxukay yu' txã'wë yuwe fxiysaju we'weni's âate pta'sxya' âjawa'jsa yuumeeta'. ¿Txã'wë meetxna' wakx? ³¹Selpiia' âjawa'j maaçxah wejx thaakwe peejxsatxna txãatx mpaakwewe. Nawa adxa' txãate jweeíçxáa thaakwe peejxsa's pta'sxya'wath.

Peeygãanisa yuuçxáa kîhtewa thaakwe walasa'

13 ¹Adxa' makwe seena' wala zhiçxkwe we'weya' jii yu'nja naa kiwete nasa walasa na'wë, txã'wëy angeleswe'sxte ja'da, nawa peeygãawa'j yu'sa' jiphmëe yu'nja açá' adx we'weni' kîhte yuhwa selpiimeena. ²Dxus kîh yûuya'watewa dxiikhëy jiyuya' âjawa'ja's jiph yu'nja, sa' kim yuhwa jiyunimeesa kîjkîhnawa jxuka jiisa yu'nja, sa' txã'wëy Dxusa' pu'çxhina sühwa'j yuuçxá's ûuste yajkçxçxa vxiç walatxwa fxiite ki'pxa' âjawa'ja's jiphu'nja, nawa peeygãawa'j yu'sa' jiphmëe yu'nja açá' makwe txã'wësaçxawa kîhte yuhwa seelpimeesa yu'nja. ³Txã'wëy adx jiphuni's kîjkîhnawa jxuka jtxtuude'nja, sa' adx kakwe yuhnawa kabkahn dukhma'th, nawa peeygãawa'j yu'sa' jiphmeete', kxul yuh txã'wë ya'yuuna.

⁴Maawa peeygãawa'ja's jiphsa', ûusçxa yaaki'çme', maa yakhwa jxuka ewsa', maa yuhtxwa açe'çme', iwejçx yaaki'çme', iwejçx we'we'çme', ⁵vxitetx juuna' yû'çme', peekx wët fxi'zewa'j yu's pakwe'çme', ûusçxa'çwame', açeyaaki'çme'. ⁶Pkalte vxite weteeçte', txãawe'stxxi npeevxysxijkana weçxa'çme', naasáa ew fxi'zeniçxá'sku wëtwët yajkxna weçxá'. ⁷Makwe kîhwa thëysa pa'thewa ûukh yajkxmëe peeygãawa'jçxá's jiphçxa' jxukak wanta', Dxusa' pu'çxhina sühna.

⁸Dxus kîh yûuya'watewa dxiikhëy jiyuçxa pta'sxna fxi'zenisa' pçuwa'j en âjana, açá' peena yu' txã'wë yûuwa'j peejxmëe yuuna, açá' yuwe fxiysajuwa ya'we'wemeena. Kîhtewa jxuka jiith sühnisawa pçuuna. Nawa peeygãanisa yu' bagaçxte yuhwa pçumeena. ⁹Txãa pçuwa'jsa

le'çxkwesaçxáatx jxpa'gaçxa ji'ptha'w, txãasatha'w jxuka pta'sxya' yu' äja'çmée. ¹⁰Nawa kihtewa peejxmée jxuka jiyuwa'j en ähte', txãa pçuwa'jsa le'çxkwesatx ji'ptha'w txã' skhēuutxna.

¹¹Adxa' luuçxteya' jiiimée luuçx we'weniçxáatxthu we'we', sa' luuçx üus yaakxniçxáatxthu ji'phu', sa' luuçx na'wēçxáath jii fxi'ze'. Nawa jxuka thē'jsa yuuna kähçxa', luuçx na'wē jiiimée fxi'zeni's nvxihtthu. ¹²Txã'wēy fiçxáatha'w äçxhí yu' ew jiyu'çmée, çxhi'dxte speejute thegte ma'wē psxüuçxáa vxyaakx txã'wēçxáatha'w uyu'. Nawa kihte yuhwa peejxmée jxuka ew jiyuwa'j en ähte', seena' ew puutx pdxip äate uyu'nja'w. Äçxhí yu' jxukamée le'çxkweçxáa jiith. Nawa txãa jxuka jiyuwa'j en ähte', kihte yuhwa peejxmée jxuka jiyu'nja Dxuswa ma'wē adxa's ew jiina txã'wēy. ¹³Khí'jii' pta'sxthu txãaçxáa pçuute', na'wēsa tekx üsta' txãa yu' bagaçxte yuhwa skhēwwa'jsameeta': Dxusa' pu'çxhina sühna yaakxnisa, vxite' Dxus yakh puutx uywa'ja's üythasna fxi'zenisa, vxite' peeygähna fxi'zenisa. Nawa txãa tekhsatx kxsusthu txäate thaakwesa' peeygähna fxi'zenisa'.

Yuwe fxiysaju we'weni' nasatxi' selpi'çme'

14 ¹Nyafxte' peeygāawa'ja's khuē'y wejx thaakwe mpa'pçxuwe. Txãa e'su mpaakwewe ma'wē selpiwa'ja'swa Dxus Espiritu üsu'k txäatx. Nawa i'kwe'sxtxi Dxus we'weni's pta'sxya' äjanisaçxáa wejx seelpisa'. ²Txã'wēme', maawa yuwe fxiysaju we'wesa' nasa yakhmée, Dxus yakhçxáa ne' we'we' jiyuwa'jmeesa's Dxus Espiritu kwe'we'jni, aça' kim yuhwa jiyu'çmeeta'. ³Naapkaçxha' i'kwe'sxtxi Dxus we'weni's pta'sxsa', naa kiwete nasatx kaajiyu'ju'k Dxus yakh çxhächxha fxi'zewa'ja's vxite' nxuste fxi'zeçtewa kvxiisxa'jna. ⁴Yuwe fxiysaju we'wesa' peekfiçxáak Dxus yakh çxhächxha fxi'zewa'ja's ya'jypa'ga'. Nawa Dxus we'weni's vxitetx pta'sxsa', Dxus luuçxtxi kçxhāaçxha'jsa'.

⁵Yuwe fxiysaju we'weya' jxukaysa äjawaça', wala yuh ewna süju'th adxa'. Nawa Dxus we'weni's vxitetx äate pta'sxya' äjani'sthu wejx thaakwe jxthāasu'. Txã'wē yüunisaçxáa thaakwe ewsa'. Meeçxa' txã'wē yuwe fxiysaju we'wesa üste', pukate vxite äate kaajiyu'the yu' ew yuhna, txã'wē yu' Dxus luuçx jiyutxna Dxus yakh çxhächxha fxi'zewa'ja's.

⁶Yakhthē'jwe'sx, üus miiyajkwwe: Adx pa'jçxa yuwe fxiysaju we'wete', i'kwe'sxa' çkiñçá' jiyuya' äjama'kwe? txã'wē kwe'sx we'wenimée yuwejuçxáa we'wete'. Nawa Dxus we'weni's pta'sxiççxa', kwe'sx we'weni yuweju kaapiya'jna äate kaajiyu'the yuuçxáa i'kwe'sxa' ew jiyune'kwe Dxus jxkaahnitx.

⁷Na'wēsax miiyajkwwe: músika tukanisa kuvxy vxite' kxtala txäatx ma'wēwa ksuusu'the', ya'jiyumeena mem ma'wēsa's tukaçtewa. ⁸Txã'wēy gweçxate puiiya' u'jwa'ja's ew kaajiyu'jna korneta's äate tujkameete', kim yuhwa jiyumeeçxa' pheu'jmeetxna puiiwa'ja's. ⁹I'kwe'sx yakhwa

txā'wēyçxá'. Yuwe fxiysaju we'wete', çma'wē ya'jiyukx kīh we'weçtewa? Ya'jiyumeena açá' kxul yuh yuuna. ¹⁰Isa naa kiwete! yuwe ma'wēsawa ūsyuhtha'. Nawa maa yuhwa txāawe'sx pwe'sx puutx we'weya' ājanimeesa yu' meetxna. ¹¹Maawa adx yakh we'weççxa', adx we'weni yuwe jiyunisaju we'wemeete', txāa yakha' puutx we'weya' ājame'nja nasa fxiysa na'wē. Açá' txāawa adx yakh puutx we'weya' ājameena nasa fxiysa na'wē. ¹²Txāa pa'ga i'kwe'sxa' nakwe wala kījxa'wa ājawa'ja's pakwe'i'kwe na' Dxus luuçxtxi kçxhāaçxha'jwa'jsaçxá's mpaakwewe.

¹³Txā'wē yā'the', yuwe fxiysajuçxáa we'wesa' Dxusa's mpi'kxwe txāa yuwe fxiysaju we'weni's nasatx āate kaajiyu'jya' ājaya'. ¹⁴Txā'wē yuwe jiyunimeesaju Dxusa's orāyçxa', ūste yu' Dxusa's yajkxna txā'wē ya'yuuna, nawa kīh we'weçxawa txāa yu'sa' ya'jiyumeena. ¹⁵Txā'wēte', çma'wē wejx ewki? Ūsteçxáa Dxusa's yajkxna txā'wē yūumée, kīh we'weççxawa txā'snawa jii txā'wē yuuní wejx ewna. Meeçxawa Dxusa's yajkxna memuuççxa', txā'snawa yuwe jiyunisaju memwa'jna. ¹⁶Idxa' txā'wē yuwe jiyunimeesajuçxáa Dxusa's weçxana tuuthe'jene'ga açá' nasa jiimeekwesa kxte ūssa' idx yakh ja'da Dxusa's weçxana tuuthe'jya' ājameetxna, kīh we'weçtewa jiyumeeçxa'. ¹⁷Dxusa's weçxana orāyni' idx yakh yu' wala yuh ewna, nawa vxite yu'sa' selpiimeena. ¹⁸Dxus pu'çxte adxa' vxite yuwe fxiysaju we'weya' i'kwe'sxte jxthaakwe jiith. ¹⁹Nawa yuwe jiyunimeesaju wala jxu'lj we'wena ūs na'wē', wejxwa Dxus luuçx ksxavxyte ūççxa', yuwe jiyunisaju jxu'ljmeekweçxáa kaapiya'jna we'wewaççxáa ewna sūju'th.

²⁰Yakthē'jwe'sx, luuçx le'çxkuē na'wē yuuna fxi'zenuwe. Naasáa ewmée yūuwa'lj yuuçxá's kīh yuhwa yajkxmée mfxi'zewe luuçx le'çxkuē na'wē. Nawa jxpa'yakx fxi'zewa'lj yu's thē'jsa na'wē ew yajkxna mfxi'zewe. ²¹Yuwe fxiysaju we'weni' thaakwe selpiwa'ljme's Dxus libroute na'ljī'k: Vxite ajūwe'sxtxi kwe'we'je'nja yuwe jiyunimeesaju naa nasatx pta'sxna. Nawa makwe txā'wē yūutewa, nwēese'jmeetxna jī'k. ²²Txā'wē yuwe jiyunimeesaju we'wenisa' Dxusa's weeçxsawe'sx Dxus ūsyuhna sūhna kaayaki'jwa'jsaçxá', sa' Dxusa's jiiyā'jsawe'sx jii me'. Naapkaçxha' Dxus we'weni's pta'sxya' ājanisa', Dxusa's jiisa ūstxna txāawe'sx jiiçxá'. Dxusa's weeçxsawe'sx jii me'.

Kīh yūuççxawa teeçx teeççxah we'wewa'ja'

²³Txāa pa'ga Dxus luuçx jxukaysa pkhaakheçxa kxazíi yuwe fxiysa yakh susna ūste', maaní yu' Dxus Espiritu kwe'we'jnitewa jiimeesa kūhçxa', luuku yuuna ūsta' çjīmeema'k? ²⁴Nawa jxukaysa Dxus we'weni's āate pta'sxna ūsune'kwe açá' maaní yu' ekajuwe'sx kūhçxa ūssa' jiyuna txajx pkalte fxi'zena ūsni's, i'kwe'sx txā'wē Dxus we'weni's āate pta'sxna ūspa'ga. ²⁵Txāa pa'gatey i'kwe'sx āate we'weni' txajx ūus yaakxnitxi' kpaakitxna, açá' kīiçhuçxa Dxusa's na'ljīna weçxaana: Dxusa' isa i'kwe'sx yakh yuh ūsu'ga jīna.

26 Txã'wẽ yã'the!, na'wẽ myũuwe yakthê'jwe'sx: i'kwe'sx yakh pkhaakhena ùssa maaíi yu' Dxusa's weçxana memwa'lj wáa ji'phtxna, vxite! kaapiya'ljwa'lj wáa ji'phtxna, meeçxawa Dxus we'weni's wáa kaajiyu'ljwa'lj ji'phtxna. Naapkaçxha' vxite! yuwe fxiysaju wáa Dxusa's weçxawa'lj ji'phtxna, meeçxa' txãa yuwe fxiysaju we'weni's wáa áate pta'sxwa'ljjsa ùstxna, açá' txã'wẽ yũutewa, ew yuhna Dxus luuçxtxi selpiwa'ljsate yu'. 27 Yuwe fxiysaju we'weççxa', e'z meeçxa' tekh kxazçxáa we'wewa'lja' teeçx teeçxçxah. Nawa txãa yuwe fxiysaju we'weni's áate kaajiyu'ljwa'ljjsa ùsteçxáa txã'wẽ yũuwa'lja'. 28 Nawa áate kaajiyu'ljwa'ljjsa kimwa meete!, yuwe fxiysaju kuçx we'wenuwe txãa pkhaakhenite. Kxãanpasa' yuwe fxiysaju Dxusa's weçxa wẽjeççxa', iidx ùsteçxáa weçxana mneeyũu. 29 Meeçxa' Dxus we'weni's pta'sxwa'lj wáa yuuna nawa e'z tekh kxazçxáa mwe'wewe, naapkaçxha' wẽse'ljna u'psa' jxpa'yakx wẽse'ljetxna Dxus we'wenitewa jiyuya'. 30 Meeçxawa wẽse'ljna u'psa's Dxus we'wewána pta'sxkahn, açá' yaçte we'wesa jxã'ljpkçaçx üythasçxa we'wewa'lja'. 31 Txã'wẽ Dxus we'weni's jxpa'gasa' jxukay pta'sxya' ájane'kwe, nawa vxite we'wena jxã'ljpkçaçx üythasçxa teeçx teeçxçxah. Txã'wẽ yũute!, jxukaysa piyaçxa Dxus dxi'pte wejx çxhãçxha fxi'zene'kwe. 32 Txãa pa'gatey Dxus we'weni's jxpa'gasawe'sxa' txãawe'sx ùus yaakxni's jxpa'yakxwa'lja', ma'wẽwa ùusutheni's we'wemée. 33 Txã'wẽme!, Dxusa' txã'wẽ kaypuba'ljna susna ùswa'ljsame!. Ma'wẽta Dxusa's yaakxsa msuuwe'sxwa susmée fxi'ze!, txã'wẽy fxi'zewa'lja'.

34 U'ywe'sxa' pkhaakhena ùsni kultote! paapëjxna susna ùswa'lj ji'phmeeta!. Txã'wẽ yũumée, jxpa'yakx wẽse'ljwa'lj ji'phta' kulto ki'puçte!, Dxus ley ma'wẽ jxkaathe! kxtey yuuna. 35 Kĩh paapëywa'lj ji'phçxa!, yat-su pa'ljçxa txãawe'sx nmi'tx pëyitxna. Weh yuhwa ewme! u'ywe'sx txã'wẽ kultote susna ùste!.

36 I'kwe'sxa' iwejçx yajkxna ma'wẽwa yuuwa'lj ji'phmeei'kwe. Txã'wẽ yuukahmeníi Dxus yuwe! i'kwe'sx tasxu nyafççxah kasehme!, açá' i'kwe'sxçxáa Dxus yuwe's jiisa ùsmeei'kwe. 37 Na'wẽ we'wena fxi'ljaçthu txã' Dxus jxkaahnita!, açá' Dxus we'weni's jiyusa ùswá'kwe meeçxa' Dxus Espiritu kaaũusuthe'ljni's jxpa'gasa' ùsçxa!, peekx mjiyuwe. 38 Nawa txã'wẽ jxkaahna fxi'ljnitxi! kxtey nwëese'ljmeena açá' txãa nwëese'ljsame's jxpa'gameete ewna.

39 Yakthê'jwe'sx, na'wẽ myũuwe: Dxus we'weni's áate pta'sxwa'ljçxá's wejx miiyajkxwe. Nawa yuwe fxiysaju we'weni's yup yu' meeçxawa, 40 kultote kĩhwa susmée zhiçxkwe teeçx teeçxçxah we'wena meswe.

Jesukristo ki' itxi yuuni

15 1 Açxha' na'wẽ Kristo yuwe ewte nvxiitwa'ljsa's pta'sxthu txã' ma'wẽsatewa ew kaajiyu'ljya'wath yakthê'jwe'sxtxi. I'kwe'sxa' txãa pta'sxni's jxpa'gaçxa txãajũ txutemée üsi'kwe. 2 Txãa Kristo yuwe

ewsapa'ga i'kwe'sxa' nwe'weni ewte neeyũuwa'jsai'kwe, adx pta'sxni's kxulteçxáamée ũusuh jxuka jxpa'gaçxa yu'.

³Kristo yuwe ewte nvxiitwa'jsa jini's adxna ma'wē kaapiya'the' i'kwe'sxtxiwa txā'wēyçxáath kaapiya'j txā' na'wēk yu': Dxus libroute ma'wēne' fxi'jni ũsu' aça' txā'sa' kxtey yuuna Kristo' kwe'sx pkalsa pa'gate uuk. ⁴Txajū' pedaniik yuu nawa tekh ente' ki' itxi yuuk, Dxus libroute ma'wēne' fxi'jni ũsu' txā'wēy. ⁵Ki' itxi yuuçxa', Pedro's vxyaak. Txajū' vxite txajx jxkaahnisa docesatxwa vxyaak. ⁶Txāa e'su' yakhthē'jwe'sx kinientos thaakwetx ũsu' teeçx ahte txāatxwa vxyaak, aça' txā'wē uysá' wala kuh nee itxiyta' makwe vxite' yu' uutewa. ⁷Txāa e'su' ki' vxyaaçxa', Jakobo'sku vxyaak, sa' txajx jxkaahnisatxwa ki' vxyaak jxukaysatx.

⁸Nmehte' adxnawa vxyaak, adxa' en āhmey upxsa seelpimeesa na'wēsatewa. ⁹Txāasa adxa' Jesus jxkaahnisatewe'sx vxite yakh yu', wala āhmeekwesath, sa' Jesus jxkaahnisa na'wē yuuwa ya'kxsuswa'jmeesath, txā'wē Dxus luuçxtxith ahçena fxi'ze naa pa'ga. ¹⁰Makwe txā'wēsatewa, Dxusa' adxa's peeygāhçxa txhitxhku txajx peeygāani' kxul yuume' adx yakh. Txā'wēsaxçawa adxthu vxitesate wejx jxthaakwe mjii. Nawa ew yajkxte yu' txā' adxçxáa mjii'nisa yu'çme', Dxusku adxa's peeygāhçxa txutemée ũsu' txāa pa'gaçxáath txā'wē mjii. ¹¹Nawa txāa yu' kīh yuumeena, Jesus jxkaahnisawe'sx ma'tx jxthaakwe mjii, meeçxa' adx ma'th jxthaakwe mjii. Nawa jxukaysa fxiymée txā'wēçxaxçáatha'w Kristo nwe'wewa'ja's pta'sxi', aça' txā'sna i'kwe i'kwe'sxa' ũuste jxpa'ga.

Uusaawe'sx ki' itxi yuuwa'j

¹²Kwe'sx pta'sxni' Kristo itxi yuuni'sku kaajiyu'jni yuu aça' i'kwe'sx yakh ũssa maafí yu' ¿ma'wēta uusaawe'sxa' itxi yuuwa'jsameeta' jina we'we'? ¹³Uusaawe'sx itxi yuuwa'jsameete', Kristowa itxi yuumeene'ga. ¹⁴Kristo itxi yuumeete', kwe'sx pta'sxni' kxul yuhna, aça' Kristo' kwe'sxtxi nwe'wesa' sūhna i'kwe'sx yaakxnisawa kxul yuhna. ¹⁵Txā'wē Kristo' itxi yuumée wá' aça' kwe'sxa' Dxus dxi'pte īsxiisa yu'nja'w, Dxusa' Kristo's itxi vxitku jina pta'sxpa'ga. Txā'wē uusaawe'sx itxi yuuwa'jsameete', Dxuswa Kristo's itxi vxitmeene'ga. ¹⁶Na'jī'th na': uusaawe'sx itxi yuuwa'jsameete', Kristowa itxi yuumeene'ga. ¹⁷Sa' Kristo itxi yuumeete', i'kwe'sx ũuste yajkççxa Kristo' kwe'sxtxi nwe'wesa' sūhnisa' kxul yuh yuune', aça' i'kwe'sx pkala' āçxpkaçç Dxus peltunāynimée ũstxna. ¹⁸Txā'wē itxi yuumée wá' aça' Kristo's ũuste jxpa'gaçxa uusaawe'sxa' vxitune'ta. ¹⁹Kristo yakh fxi'zeni' naa kiweteçxáa selpiwa'jsate', maatewa jxthaakwe kxulsa' kwe'sx ne'tka'w. ²⁰Nawa txā'wēme'. Kristo' itxi yuuyujk. Uusaawe'sx nyafxte itxi yuusa' txāak yu'. ²¹Ma'wēga naa kiwete uwa'jwa teeçx nasate takh, txā'wēy uuçxa ki' itxi yuuwa'jwa teeçx nasatek takh. ²²Teeçxsa Adanpa'gaçxáa

jxukaysatx uuwa'ja's ji'phu, txã'wëy teeçxsa Kristopa'gaçxáa jxukaysatx ki' itxi yuuwa'ja'swa ji'phu. ²³Nawa txãawe'sx itxi yuuwa'j en ähte fxiifxiixah itxi yuutxna. Nyafxte' Kristo khuë'yku yaçte itxi yuu. Txãa e'suh Kristo ki' kiijana naapkaçx Kristo's jxpa'gaçxa uusaawe'sx itxi yuutxna. ²⁴Txãa e'su nmehsa pa'jana, txajü Kristo' naa kiwetewe'sx vxite' cielutewe'sx ma'tx yuu nawa kih yuhwa nvxihtméé jxuka kaapçu'ju'jçxa txajx jxkaahni's jxuka dukhena Ney'a's, txãa yuuçxáa jxkaakhan. ²⁵Nawa txã'wë yuumey yu' Kristo khuë'y jxkaahwa'ja's, txã'wë Dxusa' açesa jxukaysatx Kristoçxaçxá's nwëese'jwa'ja's vxitpkaçx. ²⁶Txã'wë jxukaysatx Kristoçxaçxá's nwëese'jwa'ja's vxitçxa, nmehte' uuwa'ja'swa Dxusa' ivxiituna. ²⁷Dxus librute we'weçxa': Jxukaysa Kristo's nwëese'jwa'jsata' ji'k açá' Dxuswa Kristo jxkaahni yuuna süjuwá'kwe, nawa txã'wëme'. ²⁸Açesa jxukaysa Kristoçxaçxá's nwëese'jeçpkaçxha', Dxus Nçxi'k Kristoíiwa Ney tasxte nwëese'jya' ya'dukhena Ney makwe ne' üs petx txãa yã'jçxa jxuka. Txã'wë yüute, Dxusa' txãaçxaçxáa jxkaajana.

²⁹Txã'wë uusaawe'sx itxi yuuwa'jsameete', çkijxa'çxáata txã'wë ya'bautisaí' itxi yuuwa'ja's yajkçxa?

³⁰Txã'wë itxi yuuwa'jmeete', kwe'sxa' çkijxa'çxáatka'w een isa ikh wëeni fxi'ze', itxi yuuwa'ja's pta'sxna kxultexçáa? ³¹Adxa' txã'wë yuh een isa ikh wëeni fxi'ze'th txã' ísxiinime'. Nawa, yakthë'jwe'sx, Jesukristo's üuste ji'phi'kwe txãa pa'gaçxáath txã'wë yu' weçxana. ³²Efxesotewe'sxa' yu'kh eçx na'wë seena' weesweesata' ji'tx txãawe'sx yakh iipuiith. Nawa adxa' çkih yüuçxatka uuwa'ja's üukhu'çmëé? Txã'wë uuyã'jçxa' peena yu' itxi yuuwa'jmée dxihte', isa yuh we'we'ne'ta na'wë we'wesa': Ü'na tudxna fxi'zega, uuçxa kxtee pçuwa'jsaçxáatha'w jisa'.

³³Txã'wë itxi yuuwa'jme' jini's txã'wë dxihna sühna jxpubanuwe. Txã'wëme', namikuwe'sx ewmeesa' kaypuba'jatxna ew fxi'zesa's ji'tx txã' kxtey yuuna. ³⁴I'kwe'sxa' jxpubamée fxi'zenite sxawedçxa, peena yu' pkalte fxi'zenuwe. Txã'wë yüumeeçxa' i'kwe'sx maái yu' açxpajwa Dxusa's jiimeei'kwe. Txã'wëth äate we'we' thaameçxa jxpa'yakx fxi'zekahn.

¿Uusáa ki' itxi yuuwa'ja' ma'wëkx?

³⁵Nawa maái yu' pëyiwáatxna na'jina: Uusáa ki' itxi yuuwa'ja' çma'wëkx? Kakwe çma'wësa ji'phutxki? jitxna. ³⁶Jiyuya' äja'çmeewá'kwe. I'kwe'sxa' peekx jiine'kwe kih nxinx'a'swa uuhte', txãa nxinx kajkwekhëwe'sxa' çxibi'k, naapkaçxha' dxiitewe'sx üusçxáak buçxá'. ³⁷Skuutxh nxinx ma'k yuu meeçxa' fxtüu nxinx ma'k yuu nawa uuhte' txãa nxinxíçxáa äate kãawa'jsame', txãa nxinxte üusçxáa buçxawa'jsa'. ³⁸Açá' txãa nxinxuh buçxasa' kakwe ma'wësaçxah ji'phuwa'jsatewa txã'wësak Dxusa' üsu', kih nxinxxtewa txãa iisa fxiyfyiçxah. ³⁹Txajii kakwe ma'wësawa üsta', nawa txã'wëçxaçxáa meeta'. Nasaa kakwe'

fxiyta', aça' niimal kakwewa fxiyta'. Txã'wëy fXuusáa kakwewa fxiyta', aça' yu'gawe'sx wedx kakwewa fxiyta'. ⁴⁰Txã'wëy êe walatewa ũsta', naapkaçxha' naa kiwetewa ũsta'. Nawa êe walatewe'sxa' fxiy zhiçxkweta' naa kiwetewe'sxte. ⁴¹Sek kweethni vxite' a'te kweethniwa fxiyta'. Txã'wëy estrelxa kweethni vxite' sek kweethniwa fxiyta'. Sa' estrelxa pwe'sx kweethniwa puutx fxiyçxaçxáata'.

⁴²Txã'wëy kwe'sx kakwewa fxiy yu'uwa'jsa' ki' itxi yuunijü'. Uute', kakwe pçuwa'jsa's ya'peda'k, naapkaçxha' txãa pedaniijü ki' itxi yu'k peena yu' uwa'jmée kakwe yakh. ⁴³Kakwe kazxsas ya'peda'k, nawa txajü ki' itxi yuuçxa', seena' zhiçxkwesak yu'. Kakwe selpimeesa'sku ya'peda', nawa txãajü ki' itxi yuuçxa' bagaçxte yuhwa pçumée selpiwa'jsak yu'. ⁴⁴Naa kiwete fxi'zeni kakwe' vxite', aça' Dxus tasxte fxi'zewa'j kakwewa vxite'. Txãa pa'ga kakwe naa kiwetewe'sxa's ya'peda'k, naapkaçxha' ki' itxi yuusáa kakwe' Dxus tasxte ũswa'jsa'.

⁴⁵Txajík Dxus librute we'weçxa': Nyafxte piçthê'j Adana' naa kiwete itxi fxi'zewa'ja'sçxáak ji'phu' jî'. Nawa nmehtewe'sx Adana' pçumée itxi fxi'zewa'ja's peessa'. ⁴⁶Nawa nyafxte kakwe' Dxus tasxte fxi'zewa'jsa yu'çme'. Nyafxtewe'sxa' naa kiwete fxi'zeni kakweçxáak yu', naapkaçxha' nmehte kakwe' Dxus tasxte fxi'zewa'jsa'. ⁴⁷Nyafxte piçthê'j Adana' kiwe'sku pheu'jnisa yu' naa kiwetewe'sx, naapkaçxha' e'stewe'sxa' Kristok yu' cielujüwe'sx. ⁴⁸Naa kiwete jxukaysa nasaa kakwe' nyafxte Adan kakwewa ma'wëga kiwe yu', txã'wëysa íçxáata', naapkaçxha' cielute ũswa'jsa kakwe' cielujüwe'sx kakwe na'wëy yu'uwa'jsa'. ⁴⁹Ma'wëtka'w açxwa nyafxte Adan kakwe's íçxáa ji'phuya' äja', txã'wëy Kristo kakwe's íçxáa ji'phuya' äja'nja'w txã'wë yu'uwa'j en ähte'.

⁵⁰Yakthê'jwe'sx, i'kwe'sxtxi äateth pta'sxi': Naa kakwe yakha' cielute Dxus jxkaahnite u'kaya' ya'äjameena. Naa kiwete pçuwa'jsa' çma'wë bagaçxte yuhwa pçuwa'jmée itxi fxi'zenite ũsya' äjakx?

⁵¹Äçxha' pta'sx ya'wath: Maaí yu' nee uumée ũssa' naa dudte korneta tukani nmeh susuçpkaçxha', naa kakwe's yu'pthehni yuuçxa vxite kakwe jxpa'ga'nja'w jxukaysa. ⁵²Txã'wë korneta susuçpkaçxha', uusaawe'sxa' ki' itxi yuutxna peena yu' uuya'mée, naapkaçxha' naa dudte yaakxni yuumeete nee uumée itxi ũssa kakwe' yu'pthehni yuutxna. ⁵³Txãa pa'gatey kakwe pçuusáa uunijü' vxite kakwe bagaçxte yuhwa pçuwa'jmeesa's jxpa'gawa'j ji'pha'. Sa' kwe'sx kakwe uuwa'jsa's yu'pthehçxa bagaçxte yuhwa uuwa'jmeesa's jxpa'gawa'ja'. ⁵⁴Txã'wë kakwe pçuusá' vxite kakwe bagaçxte yuhwa pçuwa'jmeesa's jxpa'gaçxa kwe'sx kakwe uuwa'jsa's yu'pthehçxa bagaçxte yuhwa uuwa'jmeesa's jxpa'ganiijü' Dxus librute we'weçxa': Uuwa'ja's ivxiitunik yuu, peena yu' uu en pa'khamen jî'k txã' kxtey yuuna. ⁵⁵Uuwa'ja' bagaçxte yuhwa mee yuukahn jxuka ivxiitute', çma'wë uuwa'j en pa'ja'kx uuwa'ja's ji'phuwa'jsamée yã'jsa's? ⁵⁶Uuwa'j ena' pkalpa'gaçxáak pa'j, aça' txãa

pkala's kçxhãaçxha'jsa' nyafxíi leyku txã'wẽ yuu. ⁵⁷Txã'wëtewa, Dxus txakwe ewte kwe'sxtxi jxpe'jsa Jesukristo pu'çxpa'ga uuwa'ja's peena yu' ji'phuwa'jsameetha'w.

⁵⁸Txãa pa'ga adx yakthê'jwe'sx, bagaçxte yuhwa pu'vxitumée Dxus yakh mfxi'zewe, Jesukristo's jwee fiçxáa çxhãçxha selpiina, txãa pa'gatey Jesukristo's selpinisa' kxulsame'!

Yakthê'jwe'sxtxi pu'çxwa'j vxuyu pkhakhni

16 ¹Nyafxíi Galaciate ũçxa', Dxus luuçtxti kaapiya'th Dxus yakh fxi'zesatx pu'çxwa'j ma'wẽ vxuyu's pkhakhwa'ja'swa aç'a' txã'sa' kxtey myüuwe. ²Ki'sen iisa teeçxsa na'wẽçxah i'kwe'sx ji'phuni's makwe ũswa'ja'swa txuhdeçxa jxaawna me'jwe, adx pa'the pkhakhna ũsya'mée. ³Kxte adx pa'jçxa' txãa pkhakhni vxuyu'sa' Jerusalenna kaja'nja, aç'a' u'jwa'jsa pakweene'kwe txãawe'sxtxi karta ũsu'nja, Jerusalente yakthê'jwe'sxtxi dukkhahn petx txãa vxuyu yã'jçxa. ⁴Meeçxa' adx yuu wáa u'jwa'j kasejena aç'a' u'jwe'nja, nawa txãawe'sxwa adx yakh pi'kxna yuweetxna.

Pablo u'jya' yaakxni

⁵Adxa' yuhçxa', Macedonia kiwey uykhẽwna yuwe'nja i'kwe'sx tasxte pa'jya'. ⁶Kxte pa'jçxa' maz en jxthẽeyuuwá'nja meeçxa' nus en skhẽwpkaçx. Aç'a' i'kwe'sxa' pu'çxhine'kwe txãajü adx ki' u'jwa'ja's. ⁷Dudteçxáa i'kwe'sx yakh puutx uyua' yuu wẽje'çmeeth. Kxte txaçxthu ũs wẽje' i'kwe'sx yakh, Dxus txã'wẽ wedxwaça'. ⁸Nawa ayte Efxesote nee ũsya'wath, Pentekostes fxiesta skhẽwpkaçx. ⁹Txã'wẽ açesa ũstewa, Dxus jji mjiiwal'j wala ew yuuça' naa pa'ga txã'sa' ivxiitume'nja süju'th.

¹⁰Timoteo pa'jawáana aç'a' mpu'çxwe, kihtewa nxusmée wët i'kwe'sx yakh ũskahn. Txã'wẽme', txãawa adx na'wẽyçxáa Jesukristo's selpisá'. ¹¹Txãa pa'ga kimwa açenuwe, wejxwa mpu'çxwe dxi'the peeixmée yuuwa'ja's, kxah adx tasxte ki' sxawedna pa'jya' ajana. Txã'wẽme', adxa' Timoteo's ũyhasna ũsthu ayte yakthê'jwe'sx yakh.

¹²Apolosa's wala pxthaa we'weth yakthê'jwe'sx yakh i'kwe'sxtxi puutx uyua' u'khan. Nawa açxhíi yu' duduuçme', sa' maa ente u'jwa'j kasehteçxáawa yuweena.

Yuwe weçxaa kaahnitx pta'sxna fxi'jni

¹³Jxpa'yakx çxhãçxha mfxi'zewe, Dxus yuuçxá's ũuste peçxkanamée yajkxna. ¹⁴Kíh yüuççxawa peeygáawa'ja's yuuçxáa yajkxna txã'wẽ myüuwe.

¹⁵Yakthê'jwe'sx, jiine'kwe Akaya kiwete nyafxçxah Kristo yuwe ewsa's jxpa'gasa' Estefxanaswe'sxta', sa' txãawe'sxa' wala selpiitx Dxus tasxte utxasaawe'sxtxi pu'çxna. ¹⁶Aça' i'kwe'sxa' peeygáawa'j ji'phi'kwe

txãawe'sxtxi's meeçxa' maawa txãawe'sx na'wëy pu'çxna selpisaatx.
 17Adxa' wala weçxa'th, Estéfxanas, Fxortunato, Akáiko txãawe'sx
 ayte pa'pha'ga. I'kwe'sxa' ayte adx yakh ùsmeeçxa', adxa's pu'çxya'
 äja'çmeei'kwe. 18Nawa txãawe'sxa' adxa's kçxhãaçxha'jtx Dxus yakh
 weçxana fxi'zewa'ja's, sa' i'kwe'sxtxiwa txã'wëy ne'ta yuu. Aça' nasa
 txãawe'sx na'wëysatxi' peeygãawa'ja'.

19Dxus yakh fxi'zesawe'sxa' Asia kiwete yuwe weçxaa kaja'tx. Txã'wëy
 Akila ptamwa yuwe weçxaa kaja'tx, kxtee pkhaakhesawe'sx yã'lçxa.
 20Yakhthê'jwe'sx jxukaysa yuwe weçxaa kaahni's mpa'gawe, sa' teeçxa
 na'wëçxah puutx mweeçxawe.

21Pablo yaasesath adx kuseju fxi'ja' i'kwe'sxtxi weçxana. 22Maaí
 yu' Jesukristo's açesa úswáatxna, açá' txãawe'sxtxi' Dxus kastigote
 ivxiituwa'j yuutxna. Kwe'sxtxi jxpe'jsa Jesukristo dud kîhwaça' sÿju'th.

23Jesukristo' i'kwe'sxtxi bedekîina. 24I'kwe'sx jxukaysatxthu adx
 peeygãani's kaja', Jesukristo's neewe'wena.